

摘藻堂四庫全書薈要

史部

欽定四庫全書薈要

史部

通志卷一百二十五

詳校官員外郎

臣楊世綸



欽定四庫全書薈要卷九千四十一

史部

通志卷一百二十五

宋右迪功郎鄭樵漁仲撰

列傳第三十八

解系

弟結
結弟育

孫旂

孟觀

牽秀

繆播

從弟

皇

甫重

張輔

李含

張方

閻鼎

索靖

子

賈

足周浚

子嵩
從父弟

謨

成公簡

苟晞

華軼

劉喬

孫耽耽子柳

劉琨

子羣興

琨兄

祖逖

兄

邵續

李

矩

段匹碑

魏浚

族子該

郭默

王導

子悅洽

洽

子珣

珣

解系字少連濟南著人也父修魏琅邪太守梁州刺史

考績為天下第一武帝受禪封梁鄒侯系及二弟結育

並清身潔已甚得聲譽時荀勗門宗彊盛朝野畏憚之

勗諸子謂系等曰我與卿為友應向我公拜勗又曰我

與尊先使君親厚系曰不奉先君遺教公若與先君厚

往日哀頓當垂書問親厚之誨非所敢承勗父子大慙
當世壯之後辟公府掾歷中書黃門侍郎散騎常侍豫
州刺史遷尚書出為雍州刺史揚烈將軍西戎校尉假
節會氏羌叛與征西將軍趙王倫討之倫信用佞人孫
秀與系爭軍事更相表奏朝廷知系守正不撓而召倫
還系表殺秀以謝氏羌不從倫秀譖之系遂坐免官以
白衣還第闔門自守及張華裴頠之被誅也倫秀以宿
憾收系兄弟梁王彤救系等倫怒曰我於水中見蟹且

惡之況此人兄弟輕我邪此而可忍孰不可忍彤苦爭之不得遂害之并戮其妻子後齊王冏起義時以裴解為冤首倫秀既誅冏乃奏理之永寧二年追贈光祿大夫加弔祭馬弟結字叔連少與系齊名辟公府掾累遷黃門侍郎歷散騎常侍豫州刺史魏郡太守御史中丞時孫秀亂關中結在都坐議秀罪應誅秀由是致憾及系被害結亦同戮女適裴氏明日當嫁而禍起裴氏欲認活之女曰家既若此我何活為亦坐死朝廷遂議革

舊制女不從坐由結女始也後贈結光祿大夫改葬加
弔祭結弟育字穉連名亞二兄歷公府掾太子洗馬尚
書郎衛軍長史弘農太守與二兄俱被害妻子徙邊

孫旂字伯旗樂安人也父歷魏晉際為幽州刺史右將
軍旂絜靜少自修立察孝廉累遷黃門侍郎出為荊州
刺史名位與二解相亞永熙中徵拜太子詹事轉衛尉
坐武庫火免官歲餘出為兗州刺史遷平南將軍假節
旂子弼及弟子髦輔琰四人並有吏材稱於當世遂與

孫秀合族及趙王倫起事夜從秀開神武門下觀閱器
仗兄弟旬月相次為公府掾尚書郎弼又為中堅將軍
領尚書左丞輔為上將軍領射聲校尉髦為武衛將軍
領太子詹事琰為武威將軍領太子左率皆賜爵開國
郡侯推崇旂為車騎將軍開府初旂以弼等受署偽朝
遣小息回責讓弼等以過差之事必為家禍弼等終不
從旂制之不可但慟哭而已及齊王冏起義四子皆伏
誅襄陽太守宗岱承冏檄斬旂夷三族弟尹字文旗歷

陳留陽平太守早卒

孟觀字叔時渤海東光人也少好讀書解天文惠帝即位稍遷殿中中郎賈后悖婦姑之禮陰欲誅楊駿而廢太后因駿專權數言之於帝又使人諷觀會楚王瑋將討駿觀受賈后旨宣詔頗加誣其事及駿誅以觀為黃門侍郎特給親信四十人遷積弩將軍封上谷郡公氏帥齊萬年反於關中衆數十萬諸將覆敗相繼中書令陳準監張華以趙梁諸王在關中雍容貴戚進不貪功

退不懼罪士卒雖衆不為之用周處喪敗職此之由上
下離心難以勝敵以觀沉毅有文武材用乃啟觀討之
觀所領宿衛兵皆趨捷勇悍并統關中士卒身當矢石
大戰十數皆破之生擒萬年威懾氐羌轉東羌校尉徵
拜右將軍趙王倫篡位以觀所在著績署為安南將軍
監河北諸軍事假節屯宛觀子平為淮南王允前鋒將
軍討倫戰死孫秀以觀杖兵在外假言平為允兵所害
贈積弩將軍以安觀義軍既起多勸觀應齊王冏觀以

紫宮帝坐無他變謂倫應之遂不從衆議而為倫守及
帝反正永饒冶令空桐機斬觀首傳于洛陽遂夷三族
牽秀字成叔武邑觀津人也祖招魏鴈門太守秀博辯
有文才性豪俠弱冠得美名為太保衛瓘尚書崔洪所
知太康中調補新安令累遷司空從事中郎與帝舅王
愷素相輕侮愷諷司隸荀愷奏秀夜在道中載高平國
守士田興妻秀即表訴被誣論愷穢行文辭亢厲以譏
詆外戚于時朝臣雖多證明其行而秀盛名美譽由是

而損遂坐免官後司空張華請為長史秀任氣好為將
帥張昌作亂長沙王又遣秀討昌秀出關因奔成都王
穎穎伐乂以秀為冠軍將軍與陸機王粹等共為河橋
之役機戰敗秀證成其罪又諂事黃門孟玖故見親於
穎惠帝西幸長安以秀為尚書秀少在京輦見司隸劉
毅奏事而扼腕慷慨自謂居司直之任當能激濁揚清
處鼓譟之間必建將帥之勲及在常伯納言亦未曾有
規獻弼違之奇也河間王顥甚親任之關東諸軍奉迎

大駕以秀為平北將軍鎮馮翊秀與顓將馬瞻等輔顓以守關中顓密遣使就東海王越求迎越遣將麋晃等迎顓時秀擁衆在馮翊晃不敢進顓長史楊騰前不應越軍懼越討之欲取秀以自効與馮翊大姓諸嚴詐稱顓命使秀罷兵秀信之騰遂殺秀於萬年

繆播字宣則蘭陵人也父悅光祿大夫播才思清辯有意義高密王泰為司空以播為祭酒累遷太弟中庶子惠帝幸長安河間王顓欲挾天子令諸侯東海王越將

起兵奉迎天子以播父時故吏委以心膂播從弟右衛
率府驍前妃之弟也越遣播詣長安說驍令奉帝還
洛約與驍分陝為伯播素為驍所敬信既相見虛懷
從之驍將張方自以罪重懼為誅首謂驍曰今據形勝
之地國富兵彊奉天子以號令誰敢不服驍惑方所謀
猶豫不決方惡播為越游說陰欲殺之播等亦慮方
為難不敢復言時越兵鋒甚盛驍深憂之播乃復說
驍急斬方以謝可不勞而安驍從之於是斬方以謝山

東諸侯顓後悔之又以兵距越屢為越所敗帝反舊都播亦從太弟還洛契闊艱難深相親狎及帝崩太弟即帝位是為懷帝以播為給事黃門侍郎俄轉侍中徙中書令任遇日隆專管詔命時越威權自己帝力不能討心甚惡之以播肩等有公輔之量又盡忠於國故委以心膂越懼為己害因入朝以兵入宮執播等於帝側帝嘆曰姦臣賊子無世無之不自我先不自我後哀哉起執播等手涕泗歔歔不能自禁越遂害之朝野憤惋咸

曰善人國之紀也而加虐焉其能終乎及越薨帝贈播
衛尉祠以少牢肩字休祖安平獻王外孫也與播名譽
畧齊初為尚書郎後遷太弟左衛率轉魏郡太守及王
浚軍逼鄴石超等大敗肩奔東海王越於徐州越使肩
與播俱入關而所說得行大駕東還越以肩為冠軍將
軍南陽太守肩從藍田出武關之南陽前守衛展距肩
不受肩乃還洛懷帝即位拜肩左衛將軍轉散騎常侍
太僕卿既而與播及帝舅王延尚書何綏太史令高堂

冲並參機密為東海王越所害

皇甫重字倫叔安定朝那人也性沉果有才用為司空
張華所知稍遷新平太守元康中華版為秦州刺史齊
王冏輔政以重弟商為參軍冏誅長沙王乂又以為參
軍時河間王顥鎮關中其將李含先與商重有隙每銜
之及此說顥曰商為乂所任重終不為人用宜急除之
以去一方之患可表遷重為內職因其經長安乃執之
重知其謀乃露檄上尚書以顥信任李含將欲為亂召

集隴上士衆以討含為名又以兵革累興今始寧息表
請遣使詔重罷兵徵含為河南尹含既就徵重不奉詔
顯遣金城太守游楷隴西太守韓稚等四郡兵攻之成
都王穎與顯起兵共攻又以討后父尚書僕射羊元之
及商為名又以商為左將軍河東太守領萬餘人於缺
門距張方為方所破顯軍遂進又既屢敗乃使商間行
齎帝手詔使游楷盡罷兵令重進軍討顯商行過長安
至新平遇其從甥從甥素憎商以告顯顯捕得商殺之

又既敗重猶堅守閉塞外門城內莫知而四郡兵築土
山攻城重輒以連弩射之所在為地窟以防外攻權變
百端外軍不能近城將士為之死戰顯知不可拔乃上
表求遣御史宣詔喻之令降重知非朝廷本意不奉詔
獲御史騶人問曰我弟將兵來欲至未騶云已為河間
王所害重失色立殺騶於是城內知無外救遂共殺重
先是重被圍急遣養子昌請救於東海王越越以顯新
廢成都王穎與山東連和不肯出兵昌乃與故殿中人

楊篇詐稱越命迎羊后於金墉城入宮以后令發兵討
張方奉迎太駕事起倉卒百官初皆從之俄而又共誅
昌

張輔字世偉南陽西鄂人也漢河間相衡之後少有幹
局與從母兄劉喬齊名初補藍田令不為豪彊所屈時
彊弩將軍龐宗西州大姓護軍趙浚宗婦族也故僮僕
放縱為百姓所患輔繩之殺其二奴又奪宗田二百餘
頃以給貧戶一縣稱之轉山陽令太尉陳準家僮亦暴

橫輔復擊殺之累遷尚書郎封宜昌亭侯轉御史中丞
時積弩將軍孟觀與明威將軍郝彥不協而觀因軍事
害彥又賈謐潘岳石崇等共相引重及義陽王威有詐
冒事輔並糾劾之梁州刺史楊欣有姊喪未經旬車騎
長史韓預彊聘其女為妻輔為中正貶預以清風俗論
者稱之及孫秀執權威構輔於秀秀惑之將繩以法輔
與秀賤曰輔徒知希慕古人當官而行不復自知小為
身計今義陽王誠弘恕不以介意然輔母年七十六常

見憂慮恐輔將以怨疾獲罪願明公留神省察輔前後
行事是國之愚臣而已秀雖凶狡知輔雅正為威所誣
乃止後遷馮翊太守是時長沙王乂以河間王顥專制
關中有不臣之跡言於惠帝密詔雍州刺史劉沉秦州
刺史皇甫重使討顥於是沉等與顥戰於長安輔遂將
兵救顥沉等敗績顥德之乃以輔代重為秦州刺史當
赴顥之難金城太守游楷亦皆有功轉梁州刺史不之
官楷聞輔之還不時迎輔陰圖之又殺天水太守封尚

欲揚威西土召隴西太守韓稚會議未決稚子朴有武
幹斬異議者即收兵伐輔輔與稚戰於遮多谷口輔軍
敗績為天水故帳下督富整所殺初輔嘗著論云管仲
不如鮑叔鮑叔知所奉知所投管仲奉主而不能濟所
奔又非濟事之國三歸反坫皆鮑不為又論班固司馬
遷云遷之著述辭約而事舉叙三千年事唯五十萬言
班固叙二百年事乃八十萬言煩省不同不如遷一也
良史述事善足以獎勸惡足以鑒誠人道之常中流小

事亦無取焉而班皆書之不如二也毀貶黷錯傷忠臣之道不如三也遷既創造固又因循難易益不同矣又遷為蘇秦張儀范雎蔡澤作傳逞辭流離亦足以明其大才故述辯士則詞藻華靡叙實錄則隱核名檢此所以遷稱良史也又論魏武帝不及劉備樂毅減於諸葛亮詞多不載

李含字世容隴西狄道人也僑居始平少有武幹兩郡並舉孝廉安定皇甫商州里年少少恃豪族以含門寒

微欲與結交含距而不納商恨焉遂諷州以短檄召含
為門亭長會州刺史郭奕素聞其賢下車擢含為別駕
遂處羣僚之右尋舉秀才薦之公府自太保掾轉秦國
郎中令司徒選含領始平中正秦王東薨含依臺儀葬
訖除喪尚書趙浚有內寵疾含不事已遂奏含不應除
喪本州大中正傳祇以名義貶含中丞傳咸上表理含
橫被貶黜帝不納含遂貶退割為五品歸長安歲餘光
祿差含為壽城邸閣督司徒王戎表含曾為大臣雖見

割削不應降為此職詔停後為始平令及趙王倫篡位
或謂孫秀曰李含有文武大才無以資人秀以為東武
陽令河間王顥表請含為征西司馬甚見信任頃之轉
為長史顥誅夏侯奭送齊王冏使與趙王倫遣張方率
衆赴倫皆含謀也後顥聞三王兵盛乃加含龍驤將軍
統席遠等鐵騎廻遣張方軍以應義師天子反正含至
潼關而還初梁州刺史皇甫商為趙王倫所任倫敗去
職詣顥顥慰撫之甚厚含諫顥曰商倫之信臣懼罪至

此不宜數與相見商知而恨之及商當還都顓置酒餞
行商因與含忿爭顓和釋之後含被徵為胡軍校尉時
商參齊王問軍事而夏侯爽兄在問府稱爽立義被西
藩枉害含心不自安問右司馬趙驤又與含有隙問將
閱武含懼驤因兵討之乃單馬出奔于顓矯稱受密詔
顓即夜見之乃說顓曰成都王至親有大功還藩甚得
衆心齊王越親而專執威權朝廷側目今檄長沙王令
討齊使先聞於齊齊必誅長沙因傳檄以加齊罪則問

可擒也既去齊立成都除逼建親以安社稷大勲也顯
從之遂表請討罔拜含為都督統張方等率諸軍以向
洛陽含屯陰盤而長沙王又誅罔含等旋師初含之本
謀欲并去罔使權歸於顯含因得肆其宿志既長沙
勝齊顯穎猶各守藩志望未允顯表含為河南尹時商
復被入任遇商兄重時為秦州刺史含疾商滋甚復與
重構隙顯自含奔還之後委以心膂復慮重襲已乃使
兵圍之更相表罪侍中馮孫黨顯請召重還商說入曰

河間之奏皆李含所交構也若不早圖禍將至矣且河間前舉由含之謀又乃殺含

張方河間人也世貧賤以材勇得幸於河間王顥累遷兼振武將軍永寧中顥表討齊王冏遣方領兵二萬為前鋒及冏被長沙王乂所殺顥及成都王穎復表討乂遣方率衆自函谷入屯河南惠帝遣左將軍商距之方以潛軍破商之衆遂入城乂奉帝討方于城內方軍望見乘輿於是小退方止之不得衆遂大敗殺傷滿于衢

巷方退壁于十三里橋人情挫衄無復固志多勸方夜遁方曰兵之利鈍是常貴因敗以為成耳我更前作壘出其不意此用兵之奇也乃夜潛進逼洛城七里又既新捷不以為意忽聞方壘成乃出戰敗績東海王越等執人送于金墉城方使郅輔取人還營炙殺之於是大掠洛陽官私奴婢萬餘人而西還長安顓加方右將軍馮翊太守蕩陰之役顓又遣方鎮洛陽上官已苗願等距之大敗而退清河王琨夜襲已願已願出奔方乃入

洛陽覃於廣陽門迎方而拜方馳下車扶止之於是復
廢皇后羊氏及帝自鄴還洛方遣息羆以三千騎奉迎
將渡河橋方又以所乘陽燧車青蓋素升三百人為小
鹵簿迎帝至芒山下方自帥萬餘騎奉雲母輿及旌旗
之飾衛帝而進方初見帝將拜帝下車自止之方在洛
既久兵士暴掠發哀獻皇女墓軍人喧喧無復留意議
欲西遷尚匿其迹欲須天子出因却移都乃請帝謁廟
帝不許方遂悉引兵入殿迎帝帝見兵至避之於竹林

中軍人引帝出方於馬上稽首曰胡賊縱橫宿衛單少
陛下今日幸臣壘臣當捍禦寇難致死無二於是軍人
便亂入宮閣爭割流蘇武帳而為馬幟方奉帝至弘農
顯遣司馬周弼報方欲廢太弟方以為不可帝至長安
以方為中領軍錄尚書事領京兆太守時豫州刺史劉
喬檄稱潁川太守劉輿迫脅范陽王虓距逆詔命及東
海王越等起兵於山東乃遣方率步騎十萬討之方屯
兵霸上而劉喬為虓等所破顯聞喬敗大懼將罷兵恐

方不從遲疑未決初方從山東來甚微賤長安富人郅
輔厚相供給及貴以輔為帳下督甚昵之顓參軍畢垣
河間冠族為方所侮忿而說顓曰張方久屯霸上聞山
東賊盛盤桓不進宜防其未萌其親信郅輔具知其謀
矣而繆播等先亦構之顓因使召輔垣迎說輔曰張方
欲反人謂卿知之王若問卿何辭以對輔驚曰實不聞
方反為之若何垣曰王若問卿但言爾爾不然必不免
禍輔既入顓問之曰張方反卿知之乎輔曰爾顓曰遣

卿取之可乎又曰爾顓於是使輔送書於方因令殺之
輔既昵於方持刀而入守閣者不疑因火下發函便斬
方頭顓以輔為安定太守初繆播等議斬方送首與越
冀東軍可罷及方死更爭入關顓頗恨之又使人殺輔
閻鼎字台臣天水人也初為太傅東海王越參軍轉卷
令行豫州刺史事屯許昌遭母喪乃於密縣間鳩聚西
州流人數千欲還鄉里值京師失守秦王出奔密中司
空荀藩藩弟司隸校尉組及中領軍華恒河南尹華薈

在密縣建立行臺以密近賊南趣許潁司徒左長史劉
疇在密為塢主中書令李暉太傅參軍騶捷劉蒼鎮軍
長史周顗司馬李述皆來赴疇僉以鼎有才用且手握
彊兵勸藩假鼎冠軍將軍豫州刺史蔚等為參佐鼎少
有大志因西土人思歸欲立功鄉里乃與撫軍長史王
毘司馬傅遜懷翼戴秦王之計謂疇捷等曰山東非霸
王處不如關中河陽令傅暢遺鼎書勸奉秦王過洛陽
謁拜山陵徑據長安糾合夷晉興起義衆尅復宗廟雪

社稷之耻鼎得書便欲詣洛流民謂北道近河懼有抄
截欲南自武關向長安疇等皆山東人咸不願西入荀
藩及疇捷等並逃散鼎追藩不及暉等見殺唯顓述走
得免遂奉秦王行止上洛為山賊所襲殺百餘人率餘
衆西至藍田時劉聰向長安為雍州刺史賈疋所逐走
還平陽疋遣人奉迎秦王遂至長安而與大司馬南陽
王保衛將軍梁芬京兆尹梁綜等並同心推戴立王為
皇太子登壇告天立社稷宗廟以鼎為太子詹事總攝

百揆梁綜與鼎爭權鼎殺綜以王毘為京兆尹鼎首建
大謀立効天下始平太守麴允撫夷護軍索綝並害其
功且欲專權馮翊太守梁緯北地太守梁肅並綜母弟
綝之姻也謀欲除鼎乃誣其有無君之心專戮大臣請
討之遂攻鼎鼎出奔雍為氐賈首所殺傳首長安

索靖字幼安敦煌人也累世官族父湛北地太守靖少
有逸羣之量與鄉人汜衷張翹索紒索永俱詣太學馳
名海內號稱敦煌五龍四人並早亡唯靖該博經史兼

通內緯州辟別駕郡舉賢良方正對策高第傳立張華
與靖一面皆厚與之相結拜駙馬都尉出為西域戊己
校尉長史太子僕同郡張勃特表以靖才藝絕人宜在
臺閣不宜遠出邊塞武帝納之擢為尚書郎與襄陽羅
尚河南潘岳吳郡顧榮同官咸器服焉靖與尚書令衛
瓘俱以善草書知名帝愛之瓘筆勝靖然有楷法遠不
能及靖在臺積年除鴈門太守遷魯相又拜酒泉太守
惠帝即位賜爵關內侯靖有先識遠量知天下將亂指

洛陽宮門銅駝歎曰會見汝在荊棘中耳元康中西戎
反叛拜靖大將軍梁王彤左司馬加蕩寇將軍屯兵粟
邑擊賊敗之遷始平內史及趙王倫篡位靖應三王義
舉以左衛將軍討孫秀有功加散騎常侍遷後將軍太
安末河間王顥舉兵向洛陽拜靖使持節監洛城諸軍
事游擊將軍領雍秦涼義兵與賊戰大破之靖亦被傷
而卒追贈太常時年六十五後又贈司空進封安樂亭
侯諡曰莊靖著五行三統正驗論辯理陰陽氣運又撰

索子晉詩各二十卷又作草書狀其辭曰聖皇御世隨時之宜倉頡既生書契是為科斗鳥篆類物象形叡哲變通意巧滋生損之隸草以崇簡易百官畢修事業並麗蓋草書之為狀也婉若銀鈎漂若驚鸞舒翼未發若舉復安蟲蛇虬蟻或往或還類阿那以羸形歛奮釁而桓桓及其逸遊盼嚮乍正乍邪騏驥暴怒逼其轡海水宸隆揚其波芝草蒲陶還相繼棠棣融融載其華玄熊對踞于山嶽飛燕相追而差池舉而察之又似乎和風

吹林偃草扇樹枝條順氣轉相比附窈窕廉筓隨體散
布紛擾擾以猗靡中持疑而猶豫玄螭蛟獸嬉其間騰
援飛颺相奔趣凌魚奮尾蛟龍反據投空自竄張設牙
距或若登高望其類或若既往而中顧或若俶儻而不
羣或若自檢於常度於是多才之英篤藝之彥役心精
微耽此文憲守道兼權觸類生變離析八體靡形不判
去繁存微大象未亂上理開元下周謹案騁辭放手雨
行冰散高音翰厲溢越流漫忽班班而成章信奇妙之

煥爛體礫落而壯麗姿光潤以粲粲命杜度運其指使
伯英迴其腕著絕勢於紈素垂百世之殊觀先時靖行
見姑臧城南石地曰此後當起宮殿至張駿於其地立
南城起宗廟建宮殿焉靖有五子鯁縷璆聿縑皆舉秀
才聿安昌鄉侯卒少子縑最知名縑字巨秀少有逸羣
之量靖每曰縑廊廟之材非簡札之用州郡吏不足汙
吾兒也舉秀才除郎中嘗報兄讐手殺三十七人時人
壯之俄轉太宰參軍除好時令入為黃門侍郎出參征

西軍事轉長安令在官有稱及成都王穎劫遷惠帝幸
鄴穎為王浚所破帝遂播越河間王顥使張方及緄東
迎乘輿以功拜鷹揚將軍轉南陽王模從事中郎劉聰
侵掠關東以緄為奮威將軍以禦之斬聰將呂逸又破
聰黨劉豐遷新平太守聰將蘇鐵劉五斗劫掠三輔除
緄安西將軍馮翊太守緄有威恩華戎嚮服賊不敢犯
及懷帝蒙塵長安又陷模被害緄泣曰與其俱死寧為
伍子胥乃赴安定與雍州刺史賈疋扶風太守梁綜安

夷護軍麴允等糾合義衆頻破賊黨修復舊館遷定宗廟進救新平大小百戰絀手擒賊帥李羌與閭鼎立秦王為皇太子及即尊位是為愍帝絀遷侍中太僕以首迎大駕升壇授璽之功封戈居伯又遷前將軍尚書右僕射領吏部京兆尹加平東將軍進號征東尋又詔授衛將軍領太尉位特進軍國之事悉以委之及劉曜侵逼王城以絀為都督征東大將軍持節討之破曜呼日逐王呼延莫以功封上洛郡公食邑萬戶拜夫人荀氏

為新豐君子石元為世子賜子弟二人鄉亭侯劉曜入
關芟麥苗緄又擊破之自長安伐劉聰聰將趙染染杖
其累捷有自矜之色帥精騎數百與緄戰大敗之染單
馬而走轉驃騎大將軍尚書左僕射錄尚書承制行事
劉曜復率衆入馮翊帝累徵兵於南陽王保保左右議
曰蝮蛇在手壯士解其腕且斷隴道以觀其變從事中
郎裴詵曰蛇已螫頭頭可截不保以胡崧行前鋒都督
須衆軍集乃當發麴允欲挾天子趣保緄以保必逞私

欲乃止自長安以西不復奉朝廷百官饑乏採稻自存
時三秦人尹桓解武等數千家盜發漢霸杜二陵多獲
珍寶帝問緄曰漢陵中物何乃多邪緄對曰漢天子即
位一年而為陵天下貢賦三分之一供宗廟一供賓客
一充山陵漢武帝享年久長比崩而茂陵不復容物其
樹皆已可拱赤眉取陵中物不能減半于今猶有朽帛
委積珠玉未盡此二陵是儉者耳亦百世之誡也後劉
曜又率衆圍京城緄與麴允固守長安小城胡崧承檄

奔命破曜于靈臺崧慮國家威舉則翹索功盛乃案兵
渭北遂還槐里城中饑窘人相食死亡逃奔不可制唯
涼州義衆千人守死不移帝使侍中宋敞送牋降於曜
緄潛留敞使其子說曜曰今城中食猶足支一歲未易
可尅也若許緄以車騎儀同萬戶郡公者請以城降曜
斬而送之曰帝王之師以義行也孤將軍十五年未曾
以譎詭敗人必窮兵極勢然後取之今索緄所說如是
天下之惡一也輒相為戮之若審兵食未盡者便可尅

疆固守如其糧竭兵微亦宜早寤天命孤恐霜威一震
玉石俱摧及帝出降緄隨帝至平陽聽以其不忠於本
朝戮之於東市

賈疋字彥度武威人魏太尉詡之曾孫也少有志畧器
望甚偉見之者莫不悅附特為武夫之所瞻仰願為致
命初辟公府遂歷顯職遷安定太守雍州刺史丁綽貪
橫失百姓心乃譖疋于南陽王模模以軍司謝班代之
疋奔瀘水與胡彭蕩仲及氐竇首結為兄弟聚衆攻班

綽奔武都足復入安定殺班愍帝以足為驃騎將軍雍
州刺史封酒泉公時諸郡百姓饑饉白骨蔽野百無一
存足率戎晉二萬餘人將伐長安西平太守竺恢亦固
守劉粲聞之使劉曜劉雅及趙染距足先攻恢不尅足
邀擊大敗之曜中流矢退走足追之至于甘泉旋自渭
橋襲蕩仲殺之遂迎秦王奉為皇太子後蕩仲子夫護
帥羣胡攻之足敗走夜墮于澗為夫護所害足勇畧有
志節以匡復晉室為己任不幸顛墜時人咸痛惜之

周浚字開林汝南安成人也父裴少府卿浚性果烈以才理見知有人倫鑒識其鄉人史曜素微賤衆所未知浚獨引之為友遂以妹妻之曜竟有名於世浚初不應州郡之辟後仕魏為尚書郎累遷御史中丞拜折衝將軍揚州刺史封射陽侯隨王渾伐吳攻破江西屯戍與孫皓中軍大戰斬偽丞相張悌等首級數千俘馘萬計進軍屯于橫江時聞龍驤將軍王濬既破上方別駕何惔說浚曰張悌率精銳之卒悉吳國之衆殄滅於此吳

之朝野莫不震懾今王龍驤既破武昌兵威甚盛順流而下所向輒尅土崩之勢見矣竊謂宜速渡江直指建鄴大軍卒至奪其膽氣可不戰而擒浚善其謀便使白渾惲曰渾闇於事機而欲慎已免咎必不我從浚固使白之渾果曰受詔但令江北抗衡吳軍不使輕進貴州雖武豈能獨平江東今者違命勝不足多若其不勝為罪已重且詔令龍驤受我節度但當具君舟楫一時俱濟耳惲曰龍驤尅萬里之寇以既濟之功來受節度未

之聞也且握兵之要可則奪之所謂受命不受辭也今
渡江必全寇獲將有何慮若疑於不濟不可謂智知而
不行不可謂忠實鄱州上下所以恨恨也渾執不聽居
無何而濬至渾召之不來乃直指三江山孫皓降於濬
渾深恨之而欲與濬爭功憚賤與浚曰書貴克讓易大
謙光斯古文所詠道家所崇前破張悌吳人失氣龍驤
因之陷其區宇論其前後我實緩師動則為傷事則不
及而今方競其功彼既不吞聲將虧雍穆之弘興矜爭

之鄙斯愚情之所不取也浚得牋即諫止渾渾不能納
遂相表奏浚既濟江與渾共行吳城壘綏撫新附以功
進封成武侯食邑六千戶賜絹六千疋明年移鎮秣陵
時吳初平屢有逃亡者頻討平之賓禮故老搜求俊乂
甚有威德吳人悅服初吳之未平也浚在弋陽南北為
互市而諸將多相襲奪以為功吳將蔡敏守于沔中其
兄珪為將在秣陵與敏書曰古者兵交使在其間軍國
固當以信義相高而聞疆場之上徃徃有襲奪互市甚

不可行弟慎無為小利而忘大備也候者得珪書以呈
浚浚曰君子也及渡江求珪得之問其本曰汝南人也
浚戲之曰吾固疑吳無君子而卿果吾鄉人遷侍中武
帝問浚卿宗後生稱誰為可答曰臣叔父子恢稱重臣
宗從父子馥稱清臣宗帝並召用浚轉少府卿以本官
領將作大匠改營宗廟訖增邑五百戶後代王渾為使
持節都督揚州諸軍事安東將軍卒于位三子顗嵩謨
顗嗣爵別有傳云嵩字仲智狷直果狹每以才氣陵物

元帝作相引為參軍及帝為晉王又拜奉朝請嵩上疏
言梓宮未反舊京未清未宜推崇尊號由是忤旨出為
新安太守嵩怏怏不悅臨發與散騎郎張嶷在侍中戴
邈坐寢貶朝士又詆毀邈邈密表之帝召嵩入面責之
曰卿矜豪傲慢敢輕忽朝廷由吾不德故耳嵩跪謝曰
昔唐虞至聖四凶在朝陛下雖盛明御世亦安能無碌
碌之臣乎帝怒收付廷尉廷尉華恒以嵩大不敬棄市
論嶷以扇和減罪除名時顓方貴重帝隱忍久之補廬

陵太守不之職更拜御史中丞是時帝以王敦勢盛漸
疎忌王導等嵩上疏言導等忠素竭誠翼成大業不宜
輕聽孤臣之言惑疑似之說放逐舊德以佞伍賢遠虧
既往之明顧傷伊管之交也疏奏帝感悟故導等獲全
王敦既害顗而使人弔嵩嵩曰亡兄天下人為天下人
所殺復何所弔敦甚銜之懼失人情故未加害用為從
事中郎嵩王應嫂父也以顗橫逆遇禍意恒憤憤嘗衆
中云應不宜統兵敦密使妖人李脫誣嵩及周筵潛相

署置遂害之嵩精於事佛臨刑猶於市誦經云謨以顗
故頻居顯職王敦死後詔贈戴若思譙王承等而未及
顗時謨為後軍將軍上疏訟若思等既蒙褒顯而顗獨
負殊恩疏奏不報謨復表陳然後追贈顗官謨歷少府
丹陽尹侍中中護軍封西平侯卒贈金紫光祿大夫諡
曰貞浚從父弟馥馥字祖宣父蕤安平太守馥少與友
人成公簡齊名俱起家為諸王文學累遷司徒左西屬
司徒王渾表馥理識清正兼有才幹主定九品檢括精

詳臣委任責成褒貶允當請補尚書郎許之稍遷司徒左長史吏部郎選舉精密論望益美轉御史中丞侍中拜徐州刺史加冠軍將軍假節徵為廷尉惠帝幸鄴成都王穎以馥守河南尹陳眎上官已等奉清河王暉為太子加馥衛將軍錄尚書馥辭不受暉令馥與上官已合軍馥以已小人縱暴終為國賊乃共司隸滿奮等謀共誅之謀泄為已所襲奮被害馥走得免及已為張方所敗召馥還攝河南尹暨東海王越迎大駕以馥為中

領軍未就遷司隸校尉加散騎常侍假節都督諸軍於
澠池帝還宮出為平東將軍都督揚州諸軍事代劉準
為鎮東將軍與周玘等討陳敏滅之以功封永寧伯馥
自經世故每欲維正朝廷忠情懇至以東海王越不盡
臣節每言論厲然越深憚之馥覩羣賊孔熾洛陽孤危
乃建策迎天子遷都壽春永嘉四年與長史吳思司馬
殷識上書即請移幸時越與荀晞不協馥不先白於越
而直上書越大怒先是越召馥及淮南太守裴碩馥不

肯行而令碩率兵先進碩貳於馥乃舉兵稱馥擅命已奉越密旨圖馥遂襲之為馥所敗碩退保東城求救于元帝帝遣揚威將軍甘卓建威將軍郭逸攻馥于壽春安豐太守孫惠帥衆應之使謝摛為檄摛馥之故將也馥見檄流涕曰必謝摛之辭也摛聞之遂毀草旬日而馥衆潰奔于項為新蔡王確所拘憂憤發病卒初華譚之失廬江也往壽春依馥及馥軍敗歸于元帝帝問曰周祖宣何至於反譚曰周馥雖死天下尚有直言之士

馥見寇賊滋蔓王威不振故欲移都以紓國難方伯不
同遂致其伐曾不踰時而京都淪沒若使從馥之謀或
可後亡也原情求實何得為反帝曰馥位為征鎮握兵
方隅召之不入危而不持亦天下之罪人也譚曰然馥
振纓中朝素有俊彥之稱出據方嶽實有偏任之重而
高畧不舉往往失和危不能持當與天下共受其責然
謂之反不亦誣乎帝意始解馥有二子密矯密字泰元
性虛簡時人稱為清士位至尚書郎矯字正元亦有才

幹

成公簡字宗舒東郡人也家世二千石性清素不求榮
利潛心味道罔有干其志者默識過人張茂先每言簡
清靜比揚子雲默識擬張安世後為中書郎時周馥已
為司隸校尉鎮東將軍簡自以才高而在馥之下謂馥
曰揚雄為郎三世不徙而王莽董賢位列三司古今一
揆耳馥甚慙之官至太子中庶子散騎常侍永嘉末奔
苟晞與晞同沒

荀晞字道將河內山陽人也少為司隸部從事校尉石
鑒深器之東海王越為侍中引為通事令史累遷陽平
太守齊王冏輔政晞參冏軍事拜尚書右丞轉左丞廉
察諸曹八坐以下皆側目憚之及冏誅晞亦坐免長沙
王又為驃騎將軍以晞為從事中郎惠帝征成都王穎
以為北軍中候及帝還洛陽晞奔范陽王虓虓承制用
晞行兗州刺史汲桑之破鄴也東海王越出次官渡以
討之命晞為前鋒桑素憚之於城外為柵以自守晞將

至頓軍休士先遣單騎示以禍福桑衆大震棄柵宵遁
嬰城固守晞陷其九壘遂定鄴而還西討呂朗等滅之
從高密王泰討青州賊劉根破汲桑故將公師藩敗石
勒於河北威名甚盛時人擬之韓白進位撫軍將軍假
節都督青兗諸軍事封東平郡侯邑萬戶晞練於官事
文簿盈積斷決如流人不敢欺其從母依之奉養甚厚
從母子求為將晞距之曰吾不以王法貸人將無後悔
邪固欲之晞乃以為督護後犯法晞杖節斬之從母叩

頭請救不聽既而素服哭之流涕曰殺卿者兗州刺史
哭弟者苟道將其杖法如此晞見朝政日亂懼禍及已
而多所交結每得珍物即貽都下親貴兗州去洛五百
里恐不鮮美募得千里牛每遣信旦發暮還初東海王
越以晞復其讐耻甚德之引升堂結為兄弟越司馬潘
滔等說曰兗州要衝魏武以之輔相漢室苟晞有大志
非純臣久令處之則患生心腹矣若遷于青州厚其名
號晞必悅公自牧兗州經緯諸夏藩衛本朝此所謂謀

之於未有為之於未亂也越以為然乃遷晞征東大將軍開府儀同三司加侍中假節都督青州諸軍事領青州刺史進為郡公晞乃多置參佐轉易守令以嚴刻立功日加斬戮流血成川人不堪命號曰屠伯頓丘太守魏植為流人所逼衆五六萬大掠兗州晞出屯無鹽以弟純領青州刑殺更甚於晞百姓號小苟酷於大苟晞尋破植時潘滔及尚書劉望等共誣陷晞晞怒表求滔等首又請越從事中郎劉洽為軍師越皆不許晞於是

昌言曰司馬元超為宰相不平使天下淆亂苟道將豈可以不義使之韓信不忍衣食之惠死於婦人之手今將誅國賊尊王室桓文豈遠哉乃移告諸州稱已功伐陳越罪狀時懷帝惡越專權乃詔晞施檄六州同共討越晞乃移諸征鎮尅期大舉會王彌遣曹嶷破琅邪北攻齊地苟純城守疑衆轉盛連營數十里晞還登城望之有懼色與賊連戰輒破之後簡精銳與賊大戰會大風揚塵晞遂敗績棄城夜走嶷追至東山部衆皆降嶷

晞單騎奔高平收郟閭得數千人帝惡越滋甚又屢密詔晞討之晞皆隨詔表聞言當祇奉詔書部分諸軍徑至項城龔行天罰初越疑晞與帝有謀使遊騎於成臯間獲晞使果得詔令及朝廷書遂大構嫌隙越出牧豫州以討晞復下檄說晞罪惡遣從事中郎楊瑁為兗州與徐州刺史裴盾共討晞晞使騎收河南尹潘滔滔夜遁乃執尚書劉曾侍中程延斬之會越薨盾敗詔晞為大將軍大都督督青徐兗豫荆揚六州諸軍事增邑二

萬戶加黃鉞先官如故晞以京邑荒饑日甚寇難交至
表請遷都遣從事中郎劉會領船數十艘宿衛五百人
獻穀千斛以迎帝朝臣多有異同俄而京師陷晞與王
讚屯倉垣豫章王端及和郁等東奔晞率羣臣尊端
為皇太子置行臺端承制以晞領太子太傅都督中外
諸軍錄尚書自倉垣徙屯蒙城讚屯陽夏晞出於孤微
位至上將志頗盈滿奴婢將千人侍妾數十終日累夜
不出戶庭刑政苛虐縱情肆欲遼西閭亭以書固諫晞

怒殺之晞從事中郎明預有疾居家聞之乃舉病諫晞
曰皇晉遭百六之數當危難之機明公親稟廟算將為
國家除暴閹亨美士柰何無罪一旦殺之晞怒曰我自
殺閹亨何關人事而輦疾來罵我左右為之戰慄預曰
以明公以禮見進預欲以禮自盡今明公怒預其若遠
近怒明公何昔堯舜之在上也以和理而興桀紂之在
上也以惡逆而滅天子且猶如此況人臣乎願明公且
置是怒而思預之言晞有慙色由是衆心稍離莫為致

用加以疾疫饑饉其將溫畿傳宣皆叛之石勒攻陽夏
滅王讚馳襲蒙城執晞署為司馬月餘乃殺之晞無子
弟純亦遇害

華軼字彥夏平原人魏太尉歆之曾孫也祖表太中大
夫父澹河南尹軼少有才氣聞於當世汎愛博納衆論
美之初為博士累遷散騎常侍東海王越牧兗州引為
留府長史永嘉中歷振威將軍江州刺史雖逢喪亂每
崇禮典置儒林祭酒以弘道訓乃下教曰今大義頽替

禮典無宗朝廷滯議莫能攸正當以慨然宜特立此官以弘其事軍諮祭酒杜夷棲情玄遠確然絕俗才學精博道行優備其以為儒林祭酒俄被越檄使助討諸賊軼遣前江夏太守陶侃為揚武將軍率兵三千屯夏口以為聲援軼在州甚有威惠州之豪士接以友道得江表之歡心流亡之士赴之如歸時天子孤危四方瓦解軼有匡天下之志每遣貢獻入洛不失臣節謂使者曰若洛都道斷可輸之琅邪王以明吾之為司馬氏也軼

自以受洛京所遣而為壽陽所督時洛京尚存不能祇奉元帝教命郡縣多諫之軼不納曰吾欲見詔書耳時帝遣揚烈將軍周訪率衆屯彭澤以備軼訪過姑熟著作郎干寶見而問之訪曰夫府受分令屯彭澤彭澤江州西門也華彥夏有憂天下之誠而不欲碌碌受人控御頃來紛紜粗有嫌隙今又無故以兵守其門將成其釁吾當屯尋陽故縣既在江西可以扞禦北方又無嫌於相逼也尋洛都不守司空荀藩移檄而以帝為盟主

既而帝承制改易長吏軼又不從命於是遣左將軍王
敦都督甘卓周訪宋典趙誘等討之軼遣別駕陳雄屯
彭澤以拒敦自為舟軍以為外援武昌太守馮逸次于
湓口訪擊逸破之前江州刺史衛展不為軼所禮心常
快快至是與豫章太守周廣為內應潛軍襲軼軼衆潰
奔于安城追斬之及其五子傳首建鄴初廣陵高悝寓
居江州軼辟為西曹掾尋而軼敗悝匿軼二子及妻崎
嶇經年既而遇赦悝攜之出首帝嘉而宥之

劉喬字仲彥南陽人也其先漢宗室封安衆侯傳襲歷
三代祖虞魏侍中父阜陳留相喬少為秘書郎建威將
軍王戎引為參軍伐吳之役戎使喬與參軍羅尚濟江
破武昌還授滎陽令遷太子洗馬以誅楊駿功賜爵關
中侯拜尚書右丞豫誅賈謐封安衆男累遷散騎常侍
齊王冏為大司馬初嵇紹為冏所重每下階迎之喬言
於冏曰裴張之誅朝臣畏憚孫秀故不敢受財物嵇紹
今何所逼忌故畜裴家車牛張家奴婢邪樂彥輔來公

未嘗下牀何獨加敬於紹罔乃止紹謂喬曰大司馬何故不復迎客喬曰似有正人言以卿不足迎者紹曰正人為誰喬曰其則不遠紹默然頃之遷御史中丞罔腹心董艾勢傾朝廷百寮莫敢忤旨喬二旬之間奏劾艾罪釁者六艾諷右丞苟晞免喬官復為屯騎校尉張昌之亂喬出為威遠將軍豫州刺史與荊州刺史劉弘共討昌進左將軍惠帝西幸長安喬與諸州郡舉兵迎大駕東海王越承制轉喬安北將軍冀州刺史以范陽王

虓代領豫州刺史喬以虓非天子命不受代發兵距之
潁川太守劉興昵於虓喬上尚書列興罪惡河間王顥
得喬所上乃宣詔使鎮南將軍劉弘征東大將軍劉準
平南將軍彭城王繹與喬并力攻虓於許昌興弟琨率
衆救虓未至而虓敗虓乃與琨俱奔河北未幾琨率突
騎五千濟河攻喬喬刼琨父蕃以檻車載之據考城以
距虓衆不敵而潰喬復收散卒屯于平氏河間王顥進
喬鎮東將軍假節以其長子祐為東郡太守又遣劉弘

劉準彭城王繹等率兵援喬弘與喬賤勸令解兵與虓
修好及東海王越將討喬弘又與越書請釋私嫌共存
公義既而上表朝廷乞發明詔詔越等兩釋猜嫌各保
分局時河間王顥方距關東倚喬為助不納其言東海
王越移檄天下帥甲士三萬將入關迎大駕軍次於蕭
喬懼遣子祐距越於蕭縣之靈壁劉琨分兵向許昌許
昌人納之琨自滎陽率兵迎越遇祐衆潰見殺喬衆遂
散與五百騎奔平氏帝還洛陽大赦越復表喬為太傅

軍諮祭酒越薨復以喬為都督豫州諸軍事鎮東將軍
豫州刺史卒於官時年六十三愍帝末追贈司空子挺
潁川太守挺子耽字敬道少有行檢以義尚流稱為宗
族所推博學明習詩禮三史歷度支尚書加散騎常侍
在職公平廉慎所莅著績桓立耽女壻也及立輔政以
耽為尚書令加侍中不拜改授特進金紫光祿大夫尋
卒追贈左光祿大夫開府耽子柳字叔惠亦有名譽少
登清官歷尚書左右僕射時右丞傅迪好廣讀書而不

解其義柳唯讀老子而已迪每輕之柳曰卿讀書雖多而無所解可謂書簏矣時人重其言出為徐兗江三州刺史卒贈右光祿大夫開府儀同三司喬弟又始安太守子成丹陽尹

劉琨字越石中山魏昌人漢中山靖王勝之後也祖邁有經國之才為相國參軍散騎常侍父蕃清高冲儉位至光祿大夫琨少得雋朗之目與范陽祖約俱以雄豪著名年二十六為司隸從事時征虜將軍石崇河南金

谷澗中有別廬冠絕時輩引致賓客日以賦詩琨預其
間文詠頗為當時所許秘書監賈謐參管朝政京師人
士無不傾心石崇歐陽建陸機陸雲之徒並以文才降
節事謐琨兄弟亦在其間號二十四友太尉高密王泰
辟為掾頻遷著作郎太學博士尚書郎趙王倫執政以
琨為記室督轉從事中郎倫子羣即琨姊壻也故琨父
子兄弟並為倫所委任及篡羣為皇太子琨為羣詹事
三王之討論也以琨為冠軍假節與孫秀子會率宿衛

兵三萬拒成都王頴戰於黃橋琨大敗而還焚河橋以
自固及齊王冏輔政以其父兄皆有當世之望故特宥
之拜兄興為中書郎琨為尚書左丞轉司徒左長史冏
敗范陽王虓鎮許昌引為司馬及惠帝幸長安東海王
越謀迎大駕以琨父蕃為淮北護軍豫州刺史劉喬攻
范陽王虓於許昌也琨與汝南太守杜育等率兵救之
未至而虓敗琨與虓俱奔河北琨之父母遂為劉喬所
執琨乃說冀州刺史溫羨使讓位於虓及虓領冀州遣

琨詣幽州乞師於王浚得突騎八百人與虓濟河共破
東平王楸於廩丘南走劉喬始得其父母又斬石超降
呂朗因統諸軍奉迎大駕於長安以功封廣武侯邑二
千戶永嘉元年為并州刺史加振威將軍領匈奴中郎
將琨在路上表曰臣以頑蔽志望有限因緣會遂忝
過任九月末得發道險山峻胡寇塞路輒以少擊衆冒
險而進頓伏艱危辛苦備嘗即日達壺口關臣自涉州
疆目覩困乏流移四散十不存二攜老扶弱不絕於路

及其在者鬻賣妻子生相棄捐死亡委厄白骨橫野哀
呼之聲感傷和氣羣胡數萬周匝四山動足遇掠開目
覩寇唯有壺關可得告糴而此二道九州之險數人當
路則百夫不敢進公私往反沒喪者多嬰守窮城不得
薪采耕牛既盡又乏田器以臣愚短當此至難憂如循
環不遑寢食臣伏思此州雖云邊朔實邇皇畿南通河
內東連司冀北捍殊俗西禦彊虜是勁弓良馬勇士精
騎之所出也當須委輸乃全其命今上尚書請此州穀

五百萬斛絹五百萬疋綿五百萬斤願陛下時出臣表
速見聽處朝廷許之時東嬴公騰自晉陽鎮鄴并土饑
荒百姓隨騰南下餘戶不滿二萬寇賊縱橫道路斷塞
琨募得千餘人轉鬪至晉陽府寺焚毀僵尸蔽地其有
存者饑羸無復人色荊棘成林豺狼滿道琨翦除荊棘
收葬枯骸造府朝建市獄寇盜互來掩襲常以城門為
戰場百姓負楯以耕屬鞭而耨琨撫循勞徠甚得物情
是時劉淵在離石相去三百里許琨密遣離間其部雜

虜降者萬有餘落淵甚懼遂城蒲子而居之在官未基
流人稍復雞犬之音復相接矣琨父蕃自洛赴之人士
奔逆者多歸於琨琨善於懷撫而短於控御一日之中
雖歸者數千去者亦以相繼然素奢豪嗜聲色雖暫自
矯勵而輒復縱逸河南徐潤者以音律自通遊於貴勢
琨甚愛之署為晉陽令潤恃寵驕恣干預琨政奮威護
軍令狐盛性亢直數以此為諫并勸琨除潤琨不納初
單于猗色以救東嬴公騰之功琨表其弟猗盧為代郡

公與劉希合衆於中山王浚以琨侵已之地數來擊琨
琨不能抗由是聲實稍損徐潤又譖令狐盛於琨曰盛
將勸公稱帝矣琨不之察便殺之琨母曰汝不能弘經
畧駕豪傑專欲除勝已以自安何以得濟如是禍必及
我不從盛子泥奔于劉聰具言虛實聰大喜以泥為鄉
導屬上黨太守襲醇降于聰鴈門烏丸復反琨親率精
兵禦之聰遣子粲及令狐泥乘虛襲晉陽太原太守高
喬以郡降聰琨父母並遇害琨引猗盧并力攻粲大敗

之死者十五六琨乘勝追之更不能尅猗盧以為聰未
可滅遺琨牛羊車馬而去留其將箕澹段繁等戍晉陽
琨志在復讐而屈於力弱泣血尸立撫慰傷痍移居陽
邑城以招集亡散愍帝即位拜大將軍都督并州諸軍
事加散騎常侍假節琨上疏謝罪及麴允敗劉曜斬趙
冉琨又表求滅聰勒以自効三年帝遣兼大鴻臚趙廉
持節拜琨為司空都督并冀幽三州諸軍事琨上表讓
司空受都督尅期與猗盧討劉聰尋猗盧父子相圖盧

及兄子根皆病死部落四散琨子遵先質於盧衆皆附之及是遵與箕澹等帥盧衆三萬人馬牛羊十萬悉來歸琨琨由是復振率數百騎自平城撫納之屬石勒攻樂平太守韓據請救於琨而琨自以士衆新合欲因其銳以威勒箕澹諫曰此雖晉人久在荒裔未習恩信難以法御今內收鮮卑之餘穀外抄殘胡之牛羊且閉關守險務農息士既服化感義然後用之則功可立也琨不從悉發其衆命澹領步騎二萬為前驅琨自為後繼

勒先據險要設伏以擊澹大敗之一軍皆沒并土震駭
尋又災旱琨窮蹙不能復守幽州刺史鮮卑段匹磾遣
信要琨欲與同獎王室琨由是率衆赴之從飛狐入薊
匹磾見之甚相崇重與琨結婚約為兄弟是時西都不
守元帝稱制江左琨乃令長史溫嶠勸進於是河朔征
鎮夷夏一百八十人連名上表語在元紀今書獎諭之
建武元年琨與匹磾期討石勒匹磾推琨為大都督軟
血載書檄諸方守俱集襄國琨匹磾進屯固安以俟衆

軍匹碑從弟末波納勒厚賂獨不進乃沮其計琨匹碑
以勢弱而退是歲元帝轉琨為侍中太尉其餘如故并
贈名刀琨答曰謹當躬自執佩馘截二虜匹碑奔其兄
喪琨遣世子羣送之而末波率衆要擊匹碑而敗走之
羣為末波所得末波厚禮之許以琨為幽州刺史共結
盟而襲匹碑密遣使齎羣書請琨為內應而為匹碑邏
騎所得時琨別屯故征北府小城不之知也因來見匹
碑匹碑以羣書示琨曰意亦不疑公是以白公耳琨曰

與公同盟志獎王室仰憑威力庶雪家國之耻若兒書
密達亦終不以一子之故負公而忘義也匹碑雅重琨
初無害琨意將聽還屯其弟叔軍好學有智謀為匹碑
所信謂匹碑曰吾胡夷耳所以能服晉人者畏吾衆也
今我骨肉構禍是其良圖之日若有奉琨以起吾族盡
矣匹碑遂留琨琨之庶長子遵懼誅與琨左長史楊橋
并州治中如綏閉門自守匹碑諭之不得因縱兵攻之
琨將龍季猛迫於乏食遂斬橋綏而降初琨之去晉陽

也慮及危亡而大耻未雪亦知夷狄難以義服冀輸寫
至誠僥倖萬一每見將佐發言慷慨悲其道窮欲率部
曲死於賊壘斯謀未畢竟為匹磾所拘自知必死神色
怡如也為五言詩贈其別駕盧諶託意非常攄暢幽憤
遠想張陳感鴻門白登之事用以激諶諶素無奇畧以
常詞酬和殊乖琨心重以詩贈之乃謂琨曰前篇帝王
大志非人臣所言矣然琨既忠於晉室素有重望被拘
經月遠近憤歎匹磾所署代郡太守辟閭嵩與琨所署

鴈門太守王據後將軍韓據連謀密作攻具欲以襲匹
磾而韓據女為匹磾兒妾聞其謀而告之匹磾於是執
王據辟閭嵩及其徒黨悉誅之會王敦密使匹磾殺琨
匹磾又懼衆反已遂稱有詔收琨初琨聞敦使至謂其
子曰處仲使來而不我告是殺我也死生有命但恨讐
耻不雪無以下見二親耳因歔歔不能自勝匹磾遂縊
之年四十八子姪四人俱被害朝廷以匹磾尚彊當為
國討石勒不舉琨哀三年琨故從事中郎盧諶崔悅等

上表理琨冤痛陳其本末求朝廷甄論尋而太子中庶
子溫嶠又上疏訟之帝乃下詔褒錄下幽州依舊弔祭
贈侍中太尉諡曰愍琨少負志氣有縱橫之才善交勝
已而頗浮誇與范陽祖逖為友聞逖被用與親故書曰
吾枕戈待旦志梟逆虜常恐祖生先吾著鞭其意氣相
期如此在晉陽常為胡騎所圍數重城中窘迫無計琨
乃乘月登樓清嘯賊聞之皆淒然長嘆中夜奏胡笳賊
又流涕歔歔有懷土之切向曉復吹之為四塞之聲賊

並棄園而走子羣嗣羣字公度少拜廣武侯世子隨父
在晉陽遭逢寇亂數領偏軍征討性清慎有裁斷得士
類懼心及琨為匹碑所害琨從事中郎盧諶等率餘衆
奉羣依末波溫嶠前後表稱姨弟劉羣內弟崔悅盧諶
等皆在末波中翹首南望愚謂此等並有文思於人之
中少可愍惜如蒙錄召繼絕興亡則陛下更生之恩望
古無二咸康二年成帝詔徵羣等為末波兄弟愛其才
託以道險不遣石虎滅遼西羣及諶悅同沒胡中石虎

皆優禮之以羣為中書令至再閔敗後羣遇害時勒及石虎得公卿人士多殺之其見擢用終至大官者惟有河東裴憲渤海石璞滎陽鄭系潁川荀綽北地傅暢及羣悅湛等十餘人而已與字慶孫少雋朗有才局與琨並尚書郭奕之甥名著當時京師為之語曰洛中奕奕慶孫越石辟宰府尚書郎兄弟素侮孫秀及趙王倫輔政秀執權並免其官妹適倫世子荂荂與秀不協復以與為散騎侍郎齊王冏輔政以與為中書侍郎東海王

越范陽王虓之舉兵也以輿為潁川太守及河間王顥
檄劉喬討虓於許昌矯詔歸罪於輿募能殺輿兄弟送
首者封三千戶縣侯賜絹五千匹虓之敗輿與之俱奔
河北虓既鎮鄴以輿為征虜將軍魏郡太守虓薨東海
王越將召之或曰輿猶膩也近則汚人及至越疑之輿
密視天下兵簿及倉庫牛馬器械水陸之形皆默識之
是時軍國多事每會議自潘滔以下莫知所對輿既見
越應機辯畫越傾膝酬接即以為左長史越既總錄以

與為上佐賓客滿筵文案盈几遠近書記日有數千終
日不倦或以夜繼之皆人人懽暢莫不悅附命議如流
酬對款備時人服其能比之陳遵時稱越府有三才潘
滔大才劉與長才裴邈清才越誅繆播王延等皆與謀
也延愛妾荆氏有音伎延尚未殮與便娉之未及迎又
為太傅從事中郎王雋所爭奪御史中丞傅宣劾奏越
不問與而免雋官與乃說越遣琨鎮并州為越北面之
重洛陽未敗病指疽卒時年四十七追贈驃騎將軍先

有功封定襄侯諡曰貞子演嗣演字始仁初辟太尉掾
除尚書郎以父憂去職服闋襲爵太傅東海王越引為
主簿遷太子中庶子出為陽平太守自洛奔琨琨以為
輔國將軍魏郡太守琨將討石勒以演領勇士千人行
北中郎將兗州刺史鎮廩丘演斬王桑走趙固得衆七
千人為石勒所攻演距戰勒退元帝拜為都督後將軍
假節後為石虎所圍求救於邵續段鸞鸞騎救之石虎
走隨鸞屯厭次被害弟盾為琨領兵路逢烏桓賊戰沒

胤弟挹初為太傅東海王越掾與琨俱被害挹弟啟啟弟述與琨子羣俱在末波中後並入石虎啟為虎尚書僕射後歸國穆帝拜為前將軍加給事中永和九年隨中軍將軍殷浩北伐為姚襄所敗啟戰沒述為石虎侍中隨啟歸國拜驃騎將軍

祖逖字士稚范陽道人世吏二千石為北州舊姓父武晉王掾上谷太守逖少孤兄弟六人兄該納等並開爽有才幹逖姓豁蕩不修儀檢年十四五猶未知書諸

兄每憂之然輕財好俠慷慨有節尚每至田舍輒稱兄
意散穀帛以賑貧乏以是鄉黨親族重之後乃博覽書
記該涉古今往來京師見者謂逖有贊世才具僑居陽
平年二十四陽平辟察孝廉司隸再辟舉秀才皆不行
與司空劉琨俱為司州主簿情好綢繆共被同寢中夜
聞荒雞鳴蹴琨覺曰此非惡聲也因起舞逖琨並有英
氣每語世事或中宵起坐相謂曰若四海鼎沸豪傑並
起吾與足下當相避於中原耳辟齊王冏大司馬掾長

沙王又驃騎祭酒轉主簿累遷太子中舍人豫章王從事中郎從惠帝北伐王師敗績於蕩陰遂退還洛大駕西幸長安關東諸侯范陽王虓高密王畧平昌公模等競召之皆不就東海王越以逖為典兵參軍濟陰太守母喪不之官及京師大亂逖帥親黨數百家避地淮泗以所乘車馬載同行老疾躬自徒步藥物衣糧與衆共之又多權畧是以少長咸宗之推逖為行主達泗口元帝逆用為徐州刺史尋徵為軍諮祭酒居丹徒之京口

逖以社稷傾覆常懷振復之志賓客義徒皆暴桀勇士
逖遇之如子弟時揚土大饑此輩多為盜竊攻剽富室
逖撫慰問之曰比復南塘一出不或為吏所繩逖輒擁
護救解之談者以此少逖然逖自若也時帝方拓定江
南未遑北伐逖進說曰晉室之亂非上無道而下怨叛
也由藩王爭權自相誅滅遂使戎狄乘隙毒流中原今
遺黎既被殘酷人有奮擊之志大王誠能發威命將使
若逖者為之統主則郡國豪傑必應風響赴沉溺之士

欣於來蘇庶幾國耻可雪願大王圖之帝乃以逖為奮
威將軍豫州刺史給千人廩布三千疋不給鎧杖使自
招募仍將本流徙部曲百餘家渡江中流擊楫而誓曰
祖逖不能清中原而復濟者有如大江辭色壯烈衆皆
慨歎屯于淮陰起冶鑄兵器得二千餘人而後進初北
中郎將劉演距于石勒也流人塢主張平樊雅等在譙
演署平為豫州刺史雅為譙郡太守又有董瞻于武謝
浮等十餘部衆各數百皆統屬平逖誘浮使取平浮譎

與平會遂斬以獻逖帝嘉逖勲使運糧給之而道遠不
至軍中大饑進據太丘樊雅遣衆夜襲逖遂入壘拔戟
大呼直趣逖幕軍士大亂逖命左右距之督護董昭與
賊戰走之逖率衆追討而張平餘衆助雅攻逖蓬陂塢
主陳川自號寧朔將軍陳留太守逖遣使求救於川川
遣將李頭率衆援之逖遂尅譙城初樊雅之據譙也逖
以力弱求助於南中郎將王含含遣桓宣領兵助逖逖
既尅譙宣等乃去石虎聞而引衆圍譙含又遣宣救逖

石虎聞宣至而退宣遂留助逖討諸屯塢未附者李頭之討樊雅也力戰有勲逖時獲雅駿馬頭甚欲之而不敢言逖知其意遂與之頭感逖恩遇每歎曰若得此人為主吾死無恨川聞而怒遂殺頭頭親黨馮寵率其屬四百人歸于逖川益怒遣將魏碩掠豫州諸郡大獲子女車馬逖遣將軍衛策邀擊於谷水盡獲所掠者皆令歸本軍無私焉川大懼遂以衆附石勒逖率衆伐川石虎領兵五萬救川逖設奇以擊之虎大敗收兵掠豫州

徙陳川歸襄國留桃豹等守川故城住西臺逖遣將韓
潛等鎮東臺同一大城賊從南門出入放牧逖軍開東
門相守四旬逖以布囊盛土如米狀使千餘人運上臺
又令數人擔米偽為疲極而息於道賊果逐之皆棄擔
而走賊既獲米謂逖士衆豐飽而胡戎饑久益懼無復
膽氣石勒將劉夜堂以驢千頭運糧以饋桃豹逖遣韓
潛馮鐵等追擊於汴水盡獲之桃豹宵遁退據東燕城
逖使潛進屯封丘以逼之馮鐵據二臺逖據雍丘數遣

軍要截石勒勒屯戍漸蹙候騎嘗獲濮陽人逖厚待遣歸咸感逖恩德率鄉里五百家降逖勒又遣精騎萬人距逖復為逖所破勒鎮戍歸附者甚多時趙固上官已李矩郭默等各以詐力相攻擊逖馳使和解之示以禍福遂受逖節度逖愛人下士雖疎交賤隸皆恩禮遇之由是黃河以南盡為晉土河上堡固先有任子在胡者皆聽兩屬時遣游軍偽抄之明其未附諸塢主感戴胡中有異謀輒密以聞前後尅獲皆由此也其有微功賞

不踰日躬自儉約勸督農桑尅已務施不畜資產子弟
耕耘負擔樵薪又收葬枯骨為之祭醊百姓感悅嘗致
酒大會耆老中坐流涕曰吾等老矣更得父母死將何
恨乃歌曰幸哉遺黎免俘虜三辰既朗遇慈父元酒忘
勞甘瓠脯何以詠恩歌且舞其得人心如此故劉琨與
親故書盛贊逖威德詔進逖為鎮西將軍石勒不敢闕
兵河南使成臯縣修逖母墓因與逖書求通使交市逖
不報書而聽互市收利十倍於是公私豐贍士馬日滋

方當推鋒越河掃清冀朔會朝廷將遣戴若思為都督
逖以若思吳人雖有才望無宏致遠識且已翦荆棘收
河南地而若思雍容一旦來統之意甚快快且聞王敦
與劉隗等構隙慮有內難大功不遂感激發病乃置妻
孥汝南大木山下時中原士庶咸謂逖當進據虎牢而
反置家險阨或諫之不聽逖雖內懷憂憤而圖進取不
輟營繕虎牢城城北臨黃河西接成臯四望甚遠逖恐
南無堅壘必為賊所襲乃使從子汝南太守濟率汝陽

太守張敞新蔡內史周閔率衆築壘未成而逖病甚先是華譚度闡問術人戴洋洋曰祖豫州九月當死初有妖星見于豫州之分歷陽陳訓又謂人曰今年西北大將當死逖亦見星曰為我矣方平河北而天欲殺我此乃不祐國也俄卒于雍丘年五十六豫州士女若喪考妣譙梁百姓為之立祠冊贈車騎將軍王敦久懷逆亂畏逖不敢發至是始得肆意焉尋以逖弟約代領其衆約別有傳逖兄納字士言最有操行能清言文義可觀

性至孝少孤貧常自炊爨以養母平北將軍王敦聞之
遺其一婢辟為從事中郎有戲之曰奴價倍婢納曰百
里奚何必輕於五殺皮邪轉尚書三公郎累遷太子中
庶子歷官多所駿正有補於時齊王冏建義趙王倫收
冏弟北海王寶及前黃門郎弘農董祚弟艾與冏俱起
皆將害焉納上疏救之並見宥後為中護軍太子詹事
封晉昌公以洛下將亂乃避地東南元帝作相引為軍
諮祭酒納好奕碁王隱謂之曰禹惜寸陰不聞數碁對

曰我以忘憂耳隱曰蓋聞古人遭逢則以功達其道若其不遇則以言達其道古必有之今亦宜然當今晉未有書而天下大亂舊事蕩滅君少長五都游宦四方華裔成敗皆當聞見何不記述而有裁成況國史明乎得失之跡俱取散愁此可兼濟何必圍碁然後忘憂也納深然之語在隱傳納於是言之於帝曰自古小國猶有史官況於大府安可不置因舉隱清純亮直學思沉敏五經羣史多所綜悉且好學不倦從善如流若使修著

一代之典褒貶與奪誠一時之雋也帝以問記室參軍
鍾雅雅曰納所舉雖有史才而今未能立也事遂停然
史官之立自納始也初弟約與逖同母偏相親愛納與
約異母頗有不平乃密以啟帝稱約懷陵上之性抑而
使之可也今顯侍左右假其權勢將為亂階人謂納與
約異母忌其寵貴乃露其表以示約約憎納如讐朝廷
因此棄納納既閒居但清談披文史而已及約為逆朝
野歎納有鑒裁焉溫嶠以納州里父黨敬而拜之嶠既

為時用盛稱納有名理除光祿大夫納嘗問梅陶君鄉里立月旦評何如陶曰善褒惡貶則佳法也納曰未益時王隱在坐因曰尚書稱三載考績三考黜陟幽明何得一月便行褒貶陶曰此官法也月旦私法也隱曰易云積善之家必有余慶積不善之家必有余殃稱家者豈不是官必須積久善惡乃著公私何異古人有言貞良而亡先人之殃酷烈而存先人之勲累世乃著豈但一月若必月旦則顏回食埃不免貪污盜跖引少則為

清廉朝種暮獲善惡未定矣時梅陶及鍾雅數說餘事
納輒困之因曰君汝穎之士利如錐我幽冀之士鈍如
槌持我鈍槌捶君利錐皆當摧矣陶雅並稱有神錐不
可得槌納曰假有神錐必有神槌雅無以對後卒於家
邵續字嗣祖魏郡安陽人也父乘散騎侍郎續朴素有
志烈博覽經史善談理義妙解天文初為成都王穎參
軍穎將討長沙王乂續諫曰兄弟如左右手今明公當
天下之敵而欲去一手乎續切惑之穎不納後為荀晞

參軍除沁水令時天下漸亂續去縣還家糾合亡命得數百人王浚假續綏懷流散多歸附之石勒既破浚遣又還又為督護續綏懷流散多歸附之石勒既破浚遣又還招續續以孤危無援權附於勒勒亦以又為督護既而段匹磾在薊遣書要續俱歸元帝續從之其下諫曰今棄勒歸匹磾任子危矣續垂泣曰我出身為國豈得顧子而為叛臣哉遂絕於勒勒乃害又續懼勒攻先求救於匹磾匹磾遣弟文鴛救續文鴛未至勒已率八千騎

圍續勒素畏鮮卑及聞文鴛至乃棄攻具東走續與文鴛追勒至安陵不及虜勒所署官并驅三千餘家又遣騎入抄勒北邊畧常山亦二千家而還匹磾既殺劉琨夷晉多怨叛遂率其徒依續勒南和令趙領等率廣川渤海千餘家背勒歸續而帝以續為平原樂安太守右將軍冀州刺史進平北將軍假節封祝阿子續遣兄子武邑內史存與文鴛率匹磾衆就食平原為石虎所破續先與曹窋互相侵掠窋因存等敗乃破續屯田又抄

其戶口續首尾相救疲於奔命太興初續遣存及文鴛屯濟南黃巾固因以逼窺窺懼求和俄而匹磾率衆攻段末杯石勒知續孤危遣石虎乘虛圍續石虎騎至城下掠其居人續率衆出救虎伏騎斷其後遂為虎所獲使續降其城續呼其兄子竺等曰吾志雪國難以報所受不幸至此汝等努力自勉便奉匹磾為主勿有二心時帝既聞續沒又知其部曲文武已共推續息緝為營主詔即以續本位授緝使總率所統石虎使送續於勒

勒使徐光讓之曰國家應符撥亂八表宅心遺晉怖威
遠竄揚越而續蟻封海阿跋扈王命以夷狄不足為君
邪何無上之甚也國有常刑於分甘乎續對曰晉末饑
亂奔控無所保合鄉宗庶全老幼屬大王龍飛之始委
命納質精誠無感不蒙慈恕言歸遺晉仍荷寵授誓盡
忠節實無二心且受彼厚榮而復二三其趣者恐亦不
容于明朝矣周文生于東夷大禹出自西羌帝王之興
蓋惟天命所屬德之所招當何常邪伏惟大王聖武自

天道隆虞夏凡在含生莫不延首神化耻隔皇風而況
囚乎使去真即偽不得早叩天門者大王負囚囚不負
大王也釁鼓之刑囚之常分但恨天實為之謂之何哉
勒曰其言慨至孤愧之多矣夫忠于其君者乃吾所求
也命張賓延之于館厚撫之尋以為從事中郎令自後
諸尅敵擒俊皆送之不得輒害冀獲如續之流石虎之
攻績也朝廷有王敦之逼不遑救卹續既為勒所執身
灌園鬻菜以供衣食勒屢遣察之歎曰此真高人不

如此安足貴乎嘉其清苦數賜穀帛每臨朝嗟嘆以勵
羣臣續被獲之後存及竺緝等與匹碑嬰城距寇而帝
又假存揚武將軍武邑太守勒屢遣虎攻之戰守疲苦
不能自立久之匹碑及其弟文鴛與竺緝等悉見獲惟
存得潰圍南奔在道為賊所殺續竟亦遇害

李矩字世迴平陽人也童亂時與羣兒聚戲便為其率
計畫指授有成人之量及長為吏送故縣令於長安征
西將軍梁王彤以為牙門伐氐齊萬年有殊功封東明

亭侯還為本郡督護太守宋胄欲以所親吳畿代之矩
謝病去畿恐矩復還陰使人刺矩會有人救之故得免
屬劉淵攻平陽百姓奔走矩素為鄉人所愛乃推為塢
主東屯滎陽復移新鄭矩勇毅多權畧志在立功東海
王越以為汝陰太守永嘉初使矩與汝南太守袁孚率
衆修洛陽千金塢以利運漕及洛陽不守太尉荀藩奔
陽城衛將軍華薈奔成臯時大饑賊帥侯都等每略人
而食之藩薈部曲多為所啖矩討都等滅之乃營護藩

蒼各為立屋宇輸穀以給之及藩承制建行臺假矩榮
陽太守矩招懷離散而遠近多附之石勒親率大衆襲
矩矩遣老弱入山令所在散牛馬因設伏以待之賊爭
取牛馬伏發齊呼聲動山谷遂大破之斬獲甚衆勒乃
退藩表元帝加矩冠軍將軍輅車幢蓋進封陽武縣侯
領河東平陽太守時饑饉相仍又多疫癘矩垂心撫卹
百姓賴焉會長安羣賊東下所在多虜掠矩遣部將擊
破之盡得賊所掠婦女千餘人諸將以非矩所部欲遂

留之矩曰俱是國家臣妾焉有彼此乃一時遣之時劉琨所假河內太守郭默為劉淵所逼求歸矩矩將使其甥郭誦迎致之而不敢進會劉琨遣參軍張肇率鮮卑范勝等五百餘騎往長安屬默被圍道路不通將還依邵續行至矩營矩謂肇曰默是劉公所授公家之事知無不為屠各舊畏鮮卑遂邀肇為聲援肇許之賊望見鮮卑不戰而走誦潛遣輕舟濟河使勇士夜襲懷城掩賊留營又大破之默遂率其屬歸矩後劉聰遣其從弟

暢步騎三萬討矩屯于韓王故壘相去七里遣使招矩
時暢卒至矩未暇為備遣人奉牛馬詐降于暢潛匿精
勇見其老弱暢不以為虞大饗渠帥人皆醉飽矩謀夜
襲之兵士以賊衆皆有懼色矩令郭誦禱鄭子產祠曰
君昔相鄭惡烏不鳴凶胡臭羯何得過庭使巫揚言東
里有教當遣神兵相助將士聞之皆踴躍矩乃使誦及
督護楊璋等選勇敢千人夜掩暢營獲鎧馬甚多斬首
數千級暢僅以身免先是郭默聞矩被攻遣弟芝率衆

援之既而聞破暢芝復馳來赴矩矩乃與芝馬五百匹分軍為三道夜追賊復大獲而旋先是聰使其將趙固鎮洛陽長史周振與固不協密陳固罪矩之破暢也帳中得聰書勅暢平矩訖過洛陽收固斬之便以振代固矩送書以示固固即斬振父子遂率千騎來降矩還令守洛陽後數日聰遣其太子粲率劉雅生等步騎十萬屯孟津北岸分遣雅生攻趙固於洛固奔陽城山遣弟告急矩遣郭誦屯洛口以救之誦使將張皮簡精卒千

人夜渡河梁候者告有兵至梁恃其衆不以為虞既而
誦等奄至十道俱攻梁衆驚擾一時奔潰殺傷大半因
據其營獲其軍資器械不可勝數及旦梁見皮等人少
更與雅生悉餘衆攻之苦戰二十餘日不能下矩進救
之使壯士三千汎舟迎皮賊臨河列陣作長鉤以鉤船
連戰數日不得渡而矩夜遣部將格增潛濟入皮壘與
皮選精騎千餘而殺所獲牛馬焚燒器械夜突圍而出
奔虎牢聰追之不及而退聰因憤恚發病而死帝嘉其

功拜矩都督河南三郡軍事安西將軍滎陽太守封修武縣侯及劉粲嗣位昏虐日甚其將靳準乃起兵殺粲并其宗族發聰冢斬其尸遣使歸矩稱劉淵屠各小醜因大晉事故之際作亂幽并矯稱天命至今二帝幽沒虜庭輒率衆扶持梓宮因請上聞矩馳表于帝帝遣太常韓肩等奉迎梓宮未至而準已為石勒劉曜所沒矩以衆少不足立功每慷慨憤歎及帝踐阼以為都督司州諸軍事司州刺史改封平陽縣侯將軍如故時弘農

太守尹安振威將軍宋始等四軍並屯洛陽各相疑阻
莫有固志矩默各遣千騎至洛以鎮之安等乃同謀告
石勒勒遣石生率騎五千至洛陽矩默軍皆退還俄而
四將復背勒遣使乞迎默又遣步卒五百人入洛石生
以四將相謀不能自安乃虜宋始一軍渡河而南百姓
相率歸矩於是洛中遂空矩乃表郭誦為揚武將軍陽
翟令阻水築壘且耕且守為滅賊之計屬趙固死石生
遣騎襲誦誦多計畧賊至輒設伏破之虜掠無所得生

怒又自率四千餘騎暴掠諸縣因攻誦壘接戰須臾退
軍塢坂誦率勁勇五百追及生於磐脂故亭又大破之
矩以誦功多表加赤幢曲蓋封吉陽亭侯郭默欲侵祖
約矩禁之不可遂為約所破石勒又遣其養子念襲默
默懼後患未已將降於劉曜遣參軍鄭雄詣矩謀之矩
拒而不許後勒遣其將石良率精兵五千襲矩矩逆擊
不利郭誦弟元復為賊所執賊遣元以書說矩曰去年
東平曹嶷西賓猗盧矩如牛角何不歸命矩以示誦誦

曰昔王陵母在賊猶不改意弟當何論勒復遺誦麈尾
馬鞭以示殷勤誦不答勒將石生屯洛陽大掠河南矩
默大饑默因復說矩降曜矩既為石良所破遂從默計
遣使於曜曜遣從弟岳軍于河陰欲與矩謀攻石生勒
使將圍岳岳閉門不敢出默後為石念所敗自密南奔
建康矩聞之大怒遣其將郭誦等齎書與默又勅誦曰
汝識脣亡之談不迎接郭默皆由於卿臨難逃走其必
留之誦追及襄城默自知負矩棄妻子而遁誦擁其餘

衆而歸矩待其妻子如初劉岳以其外救不至降于石
虎矩所統將士有陰謀欲歸勒者矩知之而不能討乃
率衆南走將歸朝廷衆皆道亡唯郭誦及參軍郭方功
曹張景主簿荀遠將軍騫韜江霸梁志司馬尚季弘李
瓌段秀等百餘人棄家送矩至於魯陽縣矩墜馬卒葬
襄陽之峴山

段匹磾東部鮮卑人也種類勁健世為大人父務勿塵
遣軍助東海王越有功王浚表為親晉王封遼西公嫁

女與務勿塵以結隣援懷帝即位以務勿塵為大單于
匹碑為左賢王率衆助國征討假撫軍大將軍務勿塵
死弟涉復辰以務勿塵子疾陸眷襲號劉曜逼洛陽王
浚遣督護王昌等率疾陸眷及弟文鴛從弟末杯攻石
勒於襄國勒敗還壘末杯追入壘門為勒所獲勒質末
杯遣使求和於疾陸眷疾陸眷將許之文鴛諫曰受命
討勒寧以末杯一人故縱成禽之寇既失浚意且有後
憂必不可許疾陸眷不聽以鎧馬二百五十匹金銀各

一麓贖末杯勒歸之又厚以金寶綵絹報疾陸眷疾陸眷令文鶩與石虎同盟約為兄弟遂引騎還昌等不能獨守亦還建武初匹磾推劉琨為盟主討石勒并檄涉復辰疾陸眷末杯等三面俱集襄國琨匹磾進屯固安以俟衆軍勒懼遣間使厚賂末杯然末杯思報其舊恩且因匹磾在外欲襲奪其國乃間匹磾於涉復辰疾陸眷曰以父兄而從子弟邪雖一旦有功匹磾獨收之矣涉復辰等以為然引軍而還匹磾亦止會疾陸眷病死

匹碑自薊奔喪至右北平末杯宣言匹碑將篡出軍擊
敗之末杯遂害涉復辰及其子弟黨與二百餘人自立
為單于及王浚敗匹碑領幽州刺史劉琨自并州往依
之復與匹碑結盟俱討石勒匹碑復為末杯所敗士衆
離散懼琨圖已遂害之於是晉人離散矣匹碑不能自
固北依邵續末杯又攻敗之匹碑被創謂續曰吾夷狄
篡義以至破家君若不忘舊要與吾追討君之惠也續
曰賴公威德續得效節今公有難豈得不俱遂并力追

末杯斬獲略盡又令文鴛北討末杯弟於薊城及還去城八十里聞續已沒衆懼而散復為石虎所遮文鴛以親兵數百人力戰破之始得入城虎復抄城下文鴛登城臨見欲出擊之匹磾不許文鴛曰我以勇聞故百姓杖我見人被畧而不救非丈夫也令衆失望誰復為我致死乎遂將壯士數十騎出戰殺胡甚多遇馬乏伏不能起虎呼曰大兄與我俱是我狄久望共同天不違願今日相見何故復戰請釋杖文鴛罵曰汝為寇虐久應

合死吾兄不用吾計故令汝得至此吾寧死不為汝禽
遂下馬苦戰槊折用力力戰不已石虎軍四面解馬羅
披自鄆前提文鴛文鴛戰自辰至申力極而後被執城
內大懼匹磾欲單騎歸朝續弟樂安內史洎勒兵不許
洎復欲執臺使王英送於石虎匹磾正色責之曰卿不
能遵兄之志逼吾不得歸朝亦已甚矣復欲執天子使
者我雖胡夷所未聞也因謂英曰匹磾世受重恩不忘
忠孝今日事逼欲歸罪朝廷而見逼迫忠款不遂若得

假息未死之日心不忘本遂渡黃河南匹磾著朝服持節賓從出見石虎曰我受國恩志在滅汝不幸吾國自亂以至於此既不能死又不能為汝敬也勒及石虎素與匹磾約為兄弟故虎起而拜之及到襄國又不為勒禮常著朝服持晉節經年國中謀推匹磾為主事露被害文鴛亦遇醢而死惟末杯在焉及死弟牙立牙死其後從祖就陸眷之孫遼立自務勿塵已後值晉喪亂自稱位號據有遼西之地而臣御晉人其地西盡幽州東

界遼水然所統胡晉可三萬餘家控弦可四五萬騎而
與石虎遞相侵掠連兵不息竟為虎所破徙其遺黎數
萬家於司雍之地其子蘭復聚兵與石虎為患久之及
石氏之亡末杯之子勤鳩集胡羯得萬餘人保枉人山
自稱趙王附于慕容儁俄為冉閔所敗徙于繹幕僭即
尊號儁遣慕容恪擊之勤懼而降

魏浚東郡東阿人也寓居關中初為雍州小史河間王
顥敗亂之際以為武威將軍後為度支校尉有幹用永

嘉末與流人數百家東保河陰之硤石時京邑荒歉浚
劫掠得穀麥獻之懷帝帝以為揚威將軍平陽太守度
支如故以亂不之官及洛陽陷屯于洛北石梁塢撫養
遺衆漸修軍器其附賊者皆先解喻說大晉運數靈長
行已建立歸之者甚衆其有恃遠不從命者遣將討之
服從而已不加侵暴於是遠近感悅襁負至者漸衆劉
琨承制假浚河南尹時太尉荀藩建行臺在密縣浚詣
藩諮謀軍事藩甚悅要李矩同會矩將夜赴之官屬諫

以浚不可信不宜夜往矩曰忠臣同心將何疑乎及會
客主盡懽浚因與矩相結而去劉曜忌浚得衆率衆軍
圍之劉演郭默遣軍來救曜分兵逆於河北及伏兵深
隱處以邀演默軍大破之盡虜演等騎浚夜遁走為曜
所得遂死之追贈平西將軍族子該領其衆該一名亥
本僑居京兆陰磐河間王顥之伐趙王倫以該為將兵
都尉及劉曜攻洛陽隨浚赴難先領兵屯金墉城故得
無他曜引去餘衆依之時杜預子尹為弘農太守屯宜

陽界一泉塢數為諸賊所抄掠尹要該共距之該遣其將馬瞻將三百人赴尹瞻知其無備夜襲尹殺之迎該據塢塢人震懼並服從之乃與李矩郭默相結以距賊荀藩即以該為武威將軍統城西雍涼人使討劉曜元帝承制加冠軍將軍河東太守督護河東河南平陽三郡曜嘗攻李矩該破之及矩將迎郭默該遣軍助之又與河南尹任愔相連結後漸饑弊曜寇日至欲率衆南徙衆不從該遂單騎走至南陽帝又以為前鋒都督平

北將軍雍州刺史馬瞻率該餘衆降曜曜徵發既苦瞻
又驕虐部曲遣使呼該該密往赴之其衆殺瞻而納該
該遷於新野率衆助周訪討平杜曾詔以該為順陽太
守王敦之反也梁州刺史甘卓不從欲觀該去就試以
敦旨動之該曰我本去賊惟忠於國今王公舉兵向天
子非吾所宜與也遂距而不應及蘇峻反率衆救臺軍
次石頭受陶侃節度峻未平該病篤還屯卒於道葬于
武陵從子雄統其衆

郭默河內懷人也少微賤以壯勇事太守裴整為督將
永嘉之亂默率遺衆自為塢主以漁舟抄東歸行旅積
年遂致巨富流人依附者漸衆撫循將士甚得其歡心
默婦兄同郡陸嘉取官米數石餉妹默以為違制將殺
嘉嘉懼奔石勒默乃自射殺婦以明無私遣使謁劉琨
琨加默河內太守劉淵遣從子曜討默曜列三屯圍之
欲使餓死默送妻子為質并請糴焉糴畢設守曜怒沉
默妻子于河而攻之默遣弟芝求救於劉琨琨知默狡

猾留之而緩其救默更遣人告急會芝出城浴馬使彊
與歸默乃遣芝質於石勒勒以默多詐封默書與劉曜
默使人伺得勒書便突圍投李矩後與矩并力距劉石
事見矩傳太興初除潁川太守默與石忿戰敗矩轉蹙
弱默深憂懼解印授其參軍殷嶠謂之曰李使君遇吾
甚厚今遂棄去無顏謝之三日可白吾去也乃奔陽翟
矩聞之大怒遣其將郭誦追默至襄城及之默棄家人
單馬馳去默至京都明帝授征虜將軍劉遐卒以默為

北中郎將監淮北軍事假節遐故部曲李龍等謀反詔
默與右衛將軍趙盾討平之朝廷將徵蘇峻懼其為亂
召默拜後將軍領屯騎校尉初戰有功及六軍敗績南
奔郝鑒議於曲阿北大業里作壘以分賊勢使默守之
峻遣韓晃等攻默甚急壘中頗乏水默懼分人馬出外
乃潛從南門盪出留人堅守會峻死圍解徵為右軍將
軍默樂為邊將不願宿衛及赴召謂平南將軍劉盾曰
我能禦胡而不見用右軍主禁兵若疆場有虞被使出

征方始配給將卒無素恩信不著以此臨敵少有不敗
矣時當為官擇才若人臣自擇官安得不亂乎肩曰所
論事雖然非小人所及也當發求資於肩時肩被詔免
官不即歸罪方自申理而驕侈更甚遠近怪之初默之
被徵距蘇峻也下次尋陽見肩肩參佐張滿等輕默裸
露視之默常切齒至是肩臘日餉默酒一器肫一頭默
對信投之水中忿憤益甚又僞人蓋肫先畧取祖煥所
殺孔煒女為妻煒家求之張滿等使還其家肫不與因

與盾滿有隙至是肫謂默曰劉江州不受免密有異圖
與長史司馬張滿荀楷等日夜計謀反逆已形惟忌郭
侯一人云當先除郭侯而後起事禍將至矣且深備之
默既懷恨便率其徒候旦門開襲盾盾將吏欲距默默
响之曰我被詔有所討動者誅及三族遂入至內寢盾
尚與妾卧默牽下斬之出取盾僚佐張滿荀楷等誣以
大逆傳盾首于京師詐作詔書宣視內外掠盾女及諸
妾并金寶還船初云下都俄而遂傳盾故府招桓宣王

愆期愆期懼逼勸默為平南江州默從之愆期因逃廬
山桓宣固守不應司徒王導懼不可制乃大赦天下梟
盾首於大航以默為西中郎將豫州刺史武昌太守鄧
嶽馳白太尉陶侃侃聞之投袂起曰此必詐也即日率
衆討默上疏陳默罪惡導聞之乃收盾首詔庾亮助侃
討默默欲南據豫章而侃已至城下築土山以臨之諸
軍大集團之數重侃惜默驍勇欲活之遣郭誦見默默
許降而默將張丑宋侯等恐為侃所殺故致進退不時

得出攻之轉急宋侯遂縛默求降即斬于軍門同黨死者四十人傳首京師

王導字茂弘光祿大夫覽之孫也父裁鎮軍司馬少有風鑒識量清遠年十四陳留高士張公見而奇之謂其從兄敦曰此兒容貌志氣將相之器也初襲祖爵即丘子司空劉實引為東閣祭酒遷祕書郎太子舍人尚書郎並不行後參東海王越軍事時元帝為琅邪王與導素相親善導知天下已亂遂傾心推奉潛有興復之志

帝亦雅相器重契同友執帝之在洛陽也導每勸令之
國會帝出鎮下邳請導為安東司馬軍謀密策知無不
為及徙鎮建康吳人不附居月餘士庶莫有至者導患
之會敦來朝導謂之曰琅邪王仁德雖厚而名論猶輕
兄威風已振宜有以匡濟者會三月上巳帝親觀禊乘
肩輿具威儀敦導及諸名勝皆騎從吳人紀瞻顧榮皆
江南之望竊覘之見其如此咸驚懼乃相率拜於道左
導因進計曰古之王者莫不賓禮故老存問風俗虛已

傾心以招俊乂況天下喪亂九州分裂大業草創急於
得人者乎顧榮賀循此土之望未若引之以結人心二
子既至則無不來矣帝乃使導躬造循榮二人皆應命
而至由是吳會風靡百姓歸心自此之後漸相崇奉君
臣之禮始定俄而洛京傾覆中州士女避亂江左者十
六七導勸帝收其賢人君子與之圖事時荆揚晏安戶
口殷實導為政務在清靜每勸帝尅己勵節匡主寧邦
於是尤見委仗情好日隆朝野傾心號為仲父帝嘗從

容謂導曰卿吾之蕭何也對曰大王方立命世之勲一
匡九合管仲樂毅於是乎在豈區區國臣所以擬議願
深弘神慮廣擇良能顧榮賀循紀瞻周玘皆南土之秀
願盡優禮則天下安矣帝納焉永嘉末遷丹陽太守加
輔國將軍時官制混雜臨郡者不問賢愚豪賤皆加重
號輒有鼓蓋導上牋以為紊亂典謹送鼓蓋加崇之
物請從導始帝下令嘉其冲退拜寧遠將軍尋加振威
將軍愍帝即位徵吏部郎不拜晉國既建以導為丞相

軍諮祭酒桓彝初過江見朝廷微弱謂周顗曰我以中
州多故來此欲求全活而寡弱如此將何以濟憂懼不
樂及往見導極談世事謂顗曰向見管夷吾無復憂矣
過江人士每至暇日相要出新亭飲宴周顗中坐而嘆
曰風景不殊舉目有江河之異皆相視流涕惟導愀然
變色曰當共勦力王室尅復神州何至作楚囚對泣邪
衆收淚而謝之俄拜右將軍揚州刺史監江南諸軍事
遷驃騎將軍加散騎常侍都督中外諸軍事領中書監

錄尚書事假節刺史如故導以敦統六州固辭中外都督後坐事除節于時軍旅不息學校未修導上書請建立庠序興復道教擇朝臣之子弟並入于學選明博修禮之士而為之師以為中興風化之本帝甚納之及帝登尊號百官陪列命導升御牀共坐導固辭至于三四曰若太陽下同萬物蒼生何由仰照帝乃止進驃騎大將軍儀同三司以討華軼功封武岡侯進位侍中司空假節錄尚書領中書監會太山太守徐龕反帝訪可以

鎮撫河南者導舉太子左衛率羊鑒既而鑒敗抵罪導
上疏乞自貶黜詔不許尋代賀循領太子太傅時中興
草創未置史官導始啟立於是典籍頗具時孝懷太子
為胡所害始奉諱有司奏天子三朝舉哀羣臣一哭而
已導以為皇太子副貳宸極普天有情宜同三朝之哀
從之及劉隗用事導漸見疎遠任真推分澹如也有識
咸稱導善處興廢焉王敦之反也劉隗勸帝悉誅王氏
論者為之寒心導率羣從昆弟子姪二十餘人每旦詣

臺待罪帝以導忠節有素特還朝服召見之導稽首謝
曰逆臣賊子何世無之豈意今者近出臣族帝跣而執
之曰茂弘方託百里之命於卿是何言邪乃詔曰導以
大義滅親可以吾為安東時節假之及敦得志加導守
尚書令初西都覆沒海內思主羣臣及四方並勸進於
帝時王氏彊盛有專天下之心敦憚帝賢明欲更議所
立導固爭乃止及此役也敦謂導曰不從吾言幾致覆
族導猶執正義敦無以能奪自漢魏以來賜諡多由封

爵雖位通德重先無爵者例不加諡導乃上疏言武官有爵必諡卿校常伯無爵不諡甚失制度之本意也從之自後公卿無爵而諡導所議也初帝愛琅邪王裒將有奪嫡之議以問導導曰夫立子以長且紹又賢不宜改革帝猶疑之導日夕陳諫故太子卒定及明帝即位導受遺詔輔政解揚州遷司徒一依陳羣輔魏故事王敦又舉兵內向時敦始寢疾導便率子弟發哀衆聞謂敦死咸有奮志及帝伐敦假導節都督諸軍領揚州刺

史敦平封始興郡公邑三千戶賜絹九千疋進位太保
司徒如故劔履上殿入朝不趨讚拜不名固讓帝崩導
復與庾亮等同受遺詔共輔幼主是為成帝加羽葆鼓
吹班劔二十人及石勒侵阜陵詔加導大司馬假黃鉞
出討之軍次江寧帝親餞于郊俄而賊退解大司馬庾
亮將徵蘇峻訪之於導導曰峻猜險必不奉詔且山藪
藏疾宜苞容之固爭不從亮遂召峻既而難作六軍敗
績導入宮侍帝峻以導德望不敢加害猶以本官居已

之右峻又逼乘輿幸石頭導爭之不得峻日來帝前肆
醜言導深懼有不測之禍時路永匡術賈寧並說峻令
殺導盡誅大臣更樹腹心峻敬導不納故永等貳於峻
導使參軍袁耽潛諷誘永等謀奉帝出奔義軍而峻衛
禦甚嚴事遂不果導乃攜二子隨永奔于白石及賊平
宗廟宮室並為灰燼溫嶠議遷都豫章三吳之豪請都
會稽二論紛紜未有所適導曰建康古之金陵舊為帝
里又孫仲謀劉玄德俱言王者之宅古之帝王不必以

豐儉移都苟弘衛文大帛之冠則無往不可若不績其
麻則樂土為虛矣且北寇游魂伺我之隙一旦示弱竄
於蠻越求之望實懼非良計今特宜鎮之以靜羣情自
安由是嶠等議並不行導善於因事雖無日用之益而
歲計有餘時帑藏空竭庫中唯有練數千端鬻之不售
而國用不給導患之乃與朝賢俱制練布單衣於是士
人翕然競服之練遂踊貴乃令王者出賣端至一金其
為時所慕如此六年冬烝詔歸胙於導曰無下拜導辭

疾不敢當初帝幼冲見導每拜又常與導手詔則云惶
恐言中書作詔則曰敬問於是以為定制自後元正導
入帝猶為之興馬時大旱導上疏遜位優詔不許導固
讓詔累逼之然後視事導簡素寡欲倉無儲穀衣不重
帛帝知之給布萬疋以供私費導有羸疾不堪朝會帝
幸其府縱酒作樂後令輿車入殿其見敬如此石虎掠
騎至歷陽導請出討之加大司馬假黃鉞中外諸軍事
置左右長史司馬給布萬疋俄而賊退解大司馬復轉

中外大都督進位太傅又拜丞相依漢制罷司徒官以并之是歲妻曹氏卒贈金章紫綬初曹氏性妬導甚憚之乃密營別館以處衆妾曹氏知而將往焉導恐妾被辱遽令命駕猶恐遲之以所執麈尾柄驅牛而進司徒蔡謨聞之戲導曰朝廷欲加公九錫導不之覺但謙退而已謨曰不聞餘物唯有短轅犢車長柄麈尾導大怒謂人曰吾往與羣賢共遊洛中何曾聞有蔡克兒也于時庾亮以望重地逼出鎮於外南蠻校尉陶稱間說亮

當舉兵內攻或勸導密為之防導曰吾與元規休戚是同悠悠之談宜絕智者之口則如君言元規若來吾便角巾還第復何懼哉又與稱書以為庾公帝之元舅宜善事之於是讒間遂絕時亮雖居外鎮而執朝廷之權既據上流握彊兵趣向者多歸之導內不能平常遇西風塵起舉扇自蔽徐曰元規塵汚人自漢魏以來羣臣不拜山陵導以元帝暭同布衣匪唯君臣而已每一崇進皆就拜不勝哀感由是詔百官拜陵自導始也咸和

五年薨時年六十四帝舉哀於朝堂三日遣大鴻臚持節監護喪事賜祔之禮一依漢博陸侯及安平獻王故事及葬給九游輜輶車黃屋左纛前後羽葆鼓吹虎賁班劍百人中興名臣莫與為比冊書褒顯諡曰文獻導二弟頴敞少與導俱知名時人以頴方溫太真以敞比鄧伯道並早卒導六子悅恬洽協劬薈悅字長豫弱冠有高名事親色養導甚愛之導嘗共悅奕碁爭道導笑曰相與有瓜葛那得為爾邪導性儉節帳下甘果爛敗

令棄之云勿使大郎知悅少侍講東宮歷吳王友中書

侍郎先導卒諡曰貞世子先是導夢人以百萬錢買悅
潛為祈禱者備矣尋掘地得錢百萬意甚惡之一皆藏
閉及悅疾篤導憂念特至不食積日忽見一人形狀甚
偉被甲持刀導問君是何人曰僕是蔣侯也公兒不佳
欲為請命故來耳公勿復憂因求食遂噉數升食訖勃
然謂導曰中書患非可救者言訖不見悅亦尋殞絕悅
與導語常以慎密為端導還臺及行悅未嘗不送至車

後悅既亡導還臺自悅常所送處哭至臺門又嘗為母
曹氏襲斂箱篋中物悅亡其母長使封篋不忍復開悅
無子以弟恬子混為嗣襲導爵丹陽尹卒贈太常子嘏
嗣尚都陽公主歷中領軍尚書卒子恢嗣義熙末為游
擊將軍悅弟恬字敬豫少好武不為公門所重導見悅
輒喜見恬便有怒色州辟別駕不行襲爵即丘子性悵
誕不拘禮法謝萬嘗造恬既坐少頃恬便入內萬以為
必厚待已殊有喜色恬久之乃沐頭散髮而出據胡牀

於庭中曬髮神氣傲邁竟無賓主之禮萬悵然而還晚
節更好士多技藝善奕碁為中興第一遷中書郎帝欲
以為中書令導固讓從之除後將軍魏郡太守加給事
中領兵鎮石頭導薨去官俄起為後將軍復鎮石頭轉
吳國會稽內史加散騎常侍卒贈中軍將軍諡曰憲恬
弟洽字敬和導諸子中最知名與荀羨俱有美稱弱冠
歷散騎中書郎中軍長史司徒左長史建武將軍吳郡
內史徵拜領軍尋加中書令固讓表疏十上穆帝詔曰

敬和清裁貴令昔為中書郎吾時尚小數呼見意甚親
之今所以用為令既機任須才且欲時時相見共講文
章待以友臣之義而累表固讓甚違本懷其催洽令拜
苦讓遂不受升平二年卒於官年三十六子珣珉珣
字元琳弱冠與陳郡謝玄為桓溫掾俱為溫所敬重溫
嘗謂人曰謝掾年四十必擁旄杖節王掾當作黑頭公
皆未易才也珣轉主簿時溫經畧中夏無有寧歲軍中
機務並委珣焉文武數萬人悉識其面從討袁真封東

亭侯轉大司馬參軍琅邪王友中軍長史給事黃門侍郎
玠兄弟皆謝氏壻以猜嫌致隙太傅安既與玠絕婚
又離玠妻由是二族遂成仇讐時希安旨乃出玠為豫
章太守不之官除散騎常侍不拜遷秘書監安卒後遷
侍中考武深杖之轉輔國將軍吳國內史在郡為士庶
所悅徵為尚書右僕射領吏部轉左僕射加征虜將軍
復領太子詹事時帝雅好典籍玠與殷仲堪徐邈王恭
郗恢等並以才學文章見昵於帝及王國寶自媚於會

稽王道子而與珣等不叶帝慮晏駕後怨隙必生乃出
恭恢為方伯而委珣端右珣夢人以大筆如椽與之既
覺語人云此當有大手筆事俄而帝崩哀策諡議皆珣
所草隆安初國寶用事謀黜舊臣遷珣尚書令王恭赴
山陵欲殺國寶珣止之曰國寶雖終為禍亂要罪逆未
彰今便先事而發恐大失朝野之望況擁彊兵竊發於
京輦誰謂非逆國寶若遂不改惡布天下然後順時望
除之亦無憂不濟也恭乃止既而謂珣曰比來視君一

似胡廣珣曰王陵廷爭陳平慎默但問歲終何如耳恭
尋起兵國寶將殺珣等僅而得免語在國寶傳二年恭
復舉兵假珣節進衛將軍都督琅邪水陸軍事事平上
所假節加散騎常侍四年以疾解職歲餘卒時年五十
二追贈車騎將軍開府諡曰獻穆桓立輔政改贈司徒
初珣既與謝安有隙在東聞安薨便出京師詣族弟獻
之曰吾欲哭謝公獻之驚曰所望於法護於是直前哭
之甚慟法護珣小字也珣五子弘虞柳孺曇首宋世並

有高名珣弟珉字季琰少有才藝善行書名出珣右時
人為之語曰法護非不佳僧彌難為兄僧彌珉小字也
時有外國沙門名提婆妙解法理為珣兄弟講毘曇經
珉時尚幼講未半便云已解即於別室與沙門法綱等
數人自講法綱嘆曰大義皆是但小未精耳辟州主簿
舉秀才不行後歷著作散騎郎國子博士黃門侍郎侍
中代王獻之為長兼中書令二人素齊名世謂獻之為
大令珉為小令太元十三年卒時年三十八追贈太常

二子朗練義熙中並歷侍中洽弟協字敬祖元帝撫軍
參軍襲爵武岡侯早卒無子以弟劭子謚為嗣謚字稚
遠少有美譽與譙國桓胤太原王綏齊名拜祕書郎襲
父爵遷祕書丞歷中軍長史黃門郎侍中及桓玄舉兵
詔謚銜命詣玄玄深敬昵焉拜建威將軍吳國內史未
至郡玄以為中書令領軍將軍吏部尚書遷中書監加
散騎常侍領司徒及玄將篡以謚兼太保奉璽冊詣玄
玄篡封武昌縣開國公加班劔二十人初劉裕為布衣

衆未之識也惟謚獨竒貴之常謂裕曰卿當為一代英雄及裕破桓玄謚以本官加侍中領揚州刺史錄尚書事謚既受寵桓氏常不自安護軍將軍劉毅嘗問謚曰璽綬何在謚益懼會王綏以桓氏甥自疑謀反父子兄弟皆伏誅謚從弟湛少驍果輕俠欲誘謚還吳起兵為亂乃說謚曰王綏無罪而義旗誅之是誅時望也兄少立名譽加地位如此欲不危得乎謚懼而出奔劉裕賤詣大將軍武陵王遵遣人追躡謚既還委任如先加謚


班劬二十人義熙三年卒官時年四十八追贈侍中司徒謚曰文恭三子瓘球琇入宋皆至大官協弟劭字敬倫歷東陽太守吏部郎司徒左長史丹陽尹劭美姿容有風操雖家人近習未嘗見其墮替之容桓溫甚器之遷吏部尚書尚書僕射領中領軍出為建威將軍吳國內史卒贈車騎將軍謚曰簡三子穆默恢穆臨海太守默吳國內史加二千石恢右衛將軍穆三子簡智超默二子鑒惠義熙中並歷顯職劭弟蒼字敬文恬虛守靜

不競榮利少歷清官除吏部郎侍中建威將軍吳國內
史時年饑粟貴人多餓死蒼以私米作餽粥以飴餓者
所濟活甚衆徵補中領軍不拜徙尚書領中護軍復為
征虜將軍吳國內史頃之桓冲表請蒼為江州刺史固
辭不拜轉督浙江東五郡左將軍會稽內史進號鎮軍
將軍加散騎常侍卒於官贈衛將軍子廡歷太子中庶
子司徒左長史以母喪居于吳王恭舉兵加廡建威將
軍吳國內史令起軍助為聲援廡即墨經合衆誅殺異

已仍遣前吳國內史虞嘯父等入吳興聚兵輕俠赴者
萬計廡自謂義兵一動勢未必寧可乘間而取富貴而
曾不旬日國寶賜死恭罷兵符廡去職廡大怒廻衆討
恭恭遣司馬劉牢之距戰于曲阿廡衆潰奔走遂不知
所在長子泰為恭所殺少子華以不知廡存亡憂毀布
衣蔬食後從兄謚言其死所華始發喪入仕初導渡淮
使郭璞筮之卦成璞曰吉無不利淮水絕王氏滅其後
子孫繁衍竟如璞言



通志卷一百二十五



總校官庶吉士臣侍朝

校對官庶吉士臣徐如澍

謄錄貢生臣周志禮